

大同縣志卷十六

人物前 史傳 勲節 儒林

自古人材三晉爲盛而雲中爲中原極北之區扶輿磅礴之氣蘊積深厚其鍾毓於人者亦然故瑰奇特絕之士足以冠冕人倫者不一而足茲以史傳爲第一繼之以勲節而儒林文苑功階以次相及孝友行義亦所謂行高一鄉者也寓賢之足以增重固已而技術方外且亦傳之後世君子疾沒世而名不稱焉惟生斯土者皆以鄉先正自勉則豈特爲志乘之光也歟哉

史傳

人物之見於史傳者直錄其本文無庸另爲立傳也蓋歷朝

大同縣志

卷十六

人物

一

惇史足傳信於古今邑中前賢其彪炳史冊者代不乏人文章節義流芳百世嗚呼尚矣

馮唐祖父趙人也父徙代漢興徙安陵唐以孝著爲郎中署長事文帝帝輦過問唐曰父老何自爲郎家安在具以實言文帝曰吾居代時吾尚食監高祛數爲我言趙將李齊之賢戰于鉅鹿下吾每飲食意未嘗不在鉅鹿也父老知之乎唐對曰齊尚不如廉頗李牧之爲將也上曰何已唐曰臣大父在趙時爲官帥將善李牧臣父故爲代相善李齊知其爲人也上旣聞廉頗李牧爲人良說迺拊髀曰嗟乎吾獨不得廉頗李牧爲將豈憂匈奴哉唐曰主臣陛下雖有廉頗李牧不能用也上怒起入禁中



良久召唐讓曰公衆辱我獨亡間處乎唐謝曰鄙人不知忌諱當是時匈奴新大入朝那殺北地都尉叩上以胡寇爲意迺卒復問唐曰公何以言吾不能用頗牧也唐對曰臣聞上古王者遣將也跪而推轂曰闕以內寡人制之闕以外將軍制之軍功爵賞皆決於外歸而奏之此非空言也臣大父言李牧之爲趙將居邊軍市之租皆自用饗士賞賜決於外不從中覆也委任而責成功故李牧乃得盡其知能選車千三百乘設騎萬三千匹百金之士十萬是以北逐單于破東胡滅澹林西抑彊秦南支韓魏當是時趙幾伯後會趙王遷立其母倡也用郭開讒而誅李牧令顏聚代之是以爲秦所滅今臣竊聞魏尚爲雲中守

大同縣志

卷十六

人物

二

軍市租盡以給士卒出私養錢五日壹殺牛以饗賓客軍吏舍人是以匈奴遠避不近雲中之塞虜嘗一入尚帥車騎擊之所殺甚衆夫士卒盡家人子起田中從軍安知尺籍伍符終日力戰斬首捕虜上功莫府一言不相應文吏以法繩之其賞不行吏奉法必用愚以陛下法太明賞太輕罰太重且雲中守尚坐上功首虜差六級陛下下之吏削其爵罰作之繇此言之陛下雖得李牧不能用也臣誠愚觸忌諱死罪文帝說是日令唐持節赦魏尚復以爲雲中守而拜唐爲車騎都御主中尉及郡國軍士十年景帝立以唐爲楚相武帝卽位求賢良舉唐唐時年九十餘不能爲官迺以子遂爲郎遂字三孫亦奇士魏尚槐里



人也 前漢書

李俎雲中人事景帝武帝立十七歲以左內史為強弩將軍後一歲復為強弩將軍 漢書

郭昌雲中人以校尉從大將軍元封四年以大中大夫為拔胡將軍屯朔方還擊民無功奪印 漢書

張楊字稚叔雲中人也以武勇給并州為武猛從事靈帝末天下

亂帝以所寵小黃門蹇碩為西園上軍校尉軍京都欲以禦四

方徵天下豪傑以為偏裨太祖及袁紹等皆為校尉屬之 靈帝紀曰

以虎賁中郎將袁紹為中軍校尉屯騎校尉鮑鴻為下軍校尉議郎曹操為典軍校尉趙融馮芳為助軍校尉夏牟淳于瓊為左右并州刺史丁原遣楊將兵詣碩為假司馬靈帝崩碩為何校尉

大同縣志 卷十六 人物

三

進所殺楊復為進所遣歸本州募兵得千餘人因留上黨擊山賊進敗董卓作亂楊遂以所將攻上黨太守於壺關不下畧諸縣眾至數千人山東兵起欲誅卓袁紹至河內楊與紹合復與匈奴單于於夫羅屯漳水單于欲叛紹楊不從單于執楊與俱去紹使將麴義追擊於鄴南破之單于執楊至黎陽攻破渡遼將軍耿祉軍眾復振卓以楊為建義將軍河內太守天子之在河東楊將兵至安邑拜安國將軍封晉陽侯楊欲迎天子還洛諸將不聽楊還野王建安元年楊奉董承韓暹挾天子還舊京糧乏楊以糧迎道路遂至洛陽謂諸將曰天子當與天下共之幸有公卿大臣楊當捍外難何事京都遂還野王即拜為大司



馬英雄記曰楊性仁和無威刑下人謀反發覺對之涕泣輒原不問楊素與呂布善太祖之圍

布楊欲救之不能乃出兵東市遙爲之勢其將楊醜殺楊以應太祖楊將駐固殺醜將其衆欲北合袁紹太祖遣史渙邀擊破之於大城斬固盡收其衆也魏志

秦秀字元良新興雲中人也父朗魏驍騎將軍秀少敦學行以忠直知名咸寧中爲博士何曾卒下禮官議諡秀議曰故太宰何曾雖階世族之允而少以高亮嚴肅顯登王朝事親有色養之名在官奏科尹模此二者實得臣子事上之槩然資性驕奢不循軌則詩云節彼南山惟石巖巖赫赫師尹民具爾瞻言其德行高峻動必以禮耳邱明有言儉德之恭侈惡之大也大晉受

大同縣志 卷十六 人物

命勞謙隱約曾受寵二代顯赫累世暨乎耳順之年身兼三公之位食大國之租荷保傅之貴執司徒之均二子皆金貂卿校列于帝側方之古人責深負重雖舉門盡死猶不稱位而乃驕奢過度名被九域行不履道而享位非常以古義言之非惟失輔相之宜違斷金之利也穢皇代之美壞人倫之教生天下之醜示後生之儆莫大於此自近世以來宰臣輔相未有受垢辱之聲被有司之劾父子塵累而蒙恩貸若曾者也周公弔二季之陵遲哀大教之不行於是作諡以紀其終曾參奉之啟手歸全易贊而沒蓋明慎終死而後已齊之史氏亂世陪臣耳猶書君賊累死不懲况於皇代守典之官敢畏強盛而不盡禮管子



有言禮義廉恥是謂四維四維不張國乃滅亡宰相大臣人之表儀若生極其情死又無貶是則帝室無正刑也王公貴人復何畏哉所謂四維復何寄乎謹按諡法名與實爽曰繆怙亂肆行曰醜曾之行已皆與此同宜諡繆醜公時雖不同秀議而聞者懼也秀性忌讒佞疾之如讎素輕鄙賈充及伐吳之役聞其爲大都督謂所親者曰充文案小才乃居伐國大任吾將哭以送師或止秀曰昔蹇叔知秦軍必敗故哭送其子耳今吳君無道國有自亡之形羣率踐境將不戰而潰子之哭也旣爲不智乃不救之罪於是乃止及孫皓降于王濬充未知之方以吳未可平抗表請班師充表與告捷同至朝野以充位居人上智出

大同縣志

卷十六

人物

五

人下僉以秀爲知言及充薨秀議曰充舍宗族弗授而以異姓爲後悖禮溺情以亂大倫昔鄆養外孫莒公子爲後春秋書莒人滅鄆聖人豈不知外孫親邪但以義推之則無父子耳又按詔書自非功如太宰始封後如太宰所取必已自出如太宰不得以爲比然則以外孫爲後自非元功顯德不之得也天子之禮蓋可然乎絕父母之血食開朝廷之禍門諡法昏亂紀度曰荒諡謚荒公不從王濬有平吳之勲而爲王渾所譖毀帝雖不從無明賞罰以濬爲輔國大將軍天下咸爲之怨秀乃上言曰自大晉啟祚輔國之號率以舊恩此爲王濬無功之時受九列之顯位立功之後更得寵人之辱號也匹海視之孰不失望獨



小吳大平蜀之後二將皆就如三事今濬還而降等天下安得不惑乎吳之未亡也雖以三祖之神武猶躬受其屈以孫皓之虛名足以驚動諸夏每一小出雖聖心知其垂亡然中國輒懷惶怖當爾時有借天子百萬之衆平而有之與國家結兄弟之交臣恐朝野實皆甘之耳今濬舉蜀漢之卒數旬而平吳雖舉吳人之財寶以與之本非己分有焉而據與計校乎後與劉璜等同議齊王攸事忤旨除名尋復起爲博士秀性婞直與物多忤爲博士前後垂二十年卒於官

晉書

劉殷字長盛新興人也高祖陵漢光祿大夫殷七歲喪父哀毀過禮服喪三年未嘗見齒曾祖母王氏盛冬思堇而不言食不飽

大同縣志

卷十六

人物

六

者一旬矣殷怪而問之王言其故殷時年九歲乃於澤中慟哭曰殷罪孽深重幼丁艱罰王母在堂無旬月之養殷爲人子而所思無獲皇天后土願垂哀愍聲不絕者半日於是忽若有人云止止聲殷收淚視地便有堇生也因得斛餘而歸食而不減至時堇生乃盡又嘗夜夢人謂之曰西籬下有粟寤而掘之得粟十五鍾銘曰七年粟百石以賜孝子劉殷自是食之七載方盡時人嘉其至性通感競以穀帛遺之殷受而不謝直云待後貴當相酬耳弱冠博通經史綜核羣言文章詩賦靡不該覽性倜儻有濟世之志儉而不陋清而不介望之頽然而不可侵也鄉黨親族莫不稱之郡命主簿州辟從事皆以供養無主辭不



赴命司空齊王攸辟爲掾征南將軍羊祜名參軍事皆以疾辭  
同郡張宣子識達之士也勸殷就徵殷曰當今二公有晉之棟  
楹也吾方希達如椽椽耳不恚之豈能立乎吾今王母在堂旣  
應他命無容不竭盡臣禮便不得就養子輿所以辭齊大夫良  
以色養無主故耳宣子曰如子所言豈庸人所識哉而今而後  
吾子當爲吾師矣遂以女妻之宣子者并州豪族也家富於財  
其妻怒曰我女年始十四姿識如此何慮不得爲公侯妃而遽  
以妻劉殷乎宣子曰非爾所及也誠其女曰劉殷至孝冥感兼  
才識超世此人終當遠達爲世名公汝其謹事之張氏性亦婉  
順事王母以孝聞奉殷如君父焉及王氏卒殷夫婦毀瘠幾至

滅性時樞在殯而西鄰失火風勢甚盛殷夫婦叩殯號哭火遂  
越燒東家後有二白鳩巢其庭樹自是名譽彌顯太傅楊駿輔  
政備禮聘殷殷因以母老固辭駿於是表之優詔遂其高志聽  
終色養勅所在供其衣食蠲其徭賦賜帛二百匹穀五百斛趙  
王倫篡位孫秀夙重殷名以散騎常特徵之殷逃奔鴈門及齊  
王冏輔政辟爲大司馬軍諮祭酒旣至謂殷曰先王虛心召君  
君不至今孤辟君君何能屈也殷曰世祖以大聖應期先王以  
至德輔世旣堯舜爲君稷契爲佐故殷希以一夫而距千乘爲  
不可迴之圖幸邀唐虞之世是以不懼斧鉞之戮耳今殿下以  
神武睿姿除殘反政然聖迹稍靡嚴威滋肅殷若復爾恐招華



士之誅故不敢不至也罔奇之轉拜新興太守明刑旌善甚有  
政能屬永嘉之亂沒於劉聰聰奇其才而擢任之累至侍中太  
守錄尚書事殷恒戒子孫曰事君之法當務幾諫凡人尚不可  
面斥其過而况萬乘乎夫犯顏之禍將彰君過宜上思召公咨  
商之義下念鮑助觸鱗之誅也在聰之朝與公卿恂恂然常有  
後已之色士不修操行者無得入其門然滯理不申藉殷而濟  
者亦已百數有七子五子各授一經一子授太史公一子授漢  
書一門之內七業俱興北州之學殷門爲盛竟以壽終

晉書

樊子鵠代郡平城人其先荊州蠻酋被遷於代父興平城鎮長史  
歸義侯普泰中子鵠貴顯乃贈征虜將軍荊州刺史子鵠值北

大同縣志

卷十六

人物

八

鎮擾亂南至并州爾朱榮引爲都督府倉曹參軍孝昌三年冬  
榮使子鵠詣京師靈太后見之問榮兵勢子鵠應對稱旨太后  
嘉之除直齋封南和縣開國子邑三百戶令還赴榮榮以爲行  
臺郎中行上黨郡及榮向洛以爲假節假平南將軍都督河東  
正平軍事行唐州事刺史崔元珍閉門拒守子鵠攻剋之達義  
初拜平北將軍晉州刺史封永安縣開國伯食邑千戶又兼尚  
書行臺治有威信山胡率服元顥入洛薛修義及降蜀陳雙熾  
等受顥處分率衆攻州城子鵠出與戰大破之又破修義等於  
土門以功拜撫軍將軍尋徵授都官尚書西荊州大中正後兼  
右僕射爲行臺督賈智等討呂文欣於東徐州平之還除車騎



將軍左光祿大夫進封南陽郡開國公增戶六百尚書如故仍假驃騎大將軍率所部爲都督時爾朱榮在晉陽京師之事子鵠頗預委寄故在臺閣征官不解後出除散騎常侍本將軍殷遣人牛易力多種二麥州內以此獲安及爾朱榮之死世隆等遣書招子鵠欲與同趣京師子鵠不從以母在晉陽啟求移鎮河南莊帝嘉之除車騎大將軍豫州刺史假驃騎士將軍都督二豫郢三州諸軍事兼尚書右僕射二豫郢賴四州行臺子鵠到相州又勅資絹五百匹行達汲郡聞爾朱兆入洛乃渡河見仲遠仲遠遣鎮汲郡兆徵子鵠赴洛旣見責以乖異之意奪其

大同縣志

卷十六

人物

九

部衆將還晉陽及紇豆陵步藩起以子鵠爲都督徵發糧仗元曄以爲侍中御史中尉中軍大都督隨曄向洛普泰初仍除舊任及趙修延叛於荊州詔子鵠通三鵠道而還遭母憂去職前廢帝聞其在洛無宅凶費不周資絹四百匹粟五百石以本官起之太昌初兼尚書左僕射東南道大行臺總大都督杜德等追討爾朱仲遠仲遠已奔蕭衍收其兵馬甲仗時蕭衍遣元樹入寇陷據譙城詔子鵠與德討之樹屯兵梁國欲來逆戰見子鵠軍盛夜退還譙子鵠引兵追躡樹又背城爲陳子鵠勒兵直趣城下縱騎衝突樹衆大敗奔入城門城門隘塞多自殺害於是斬千餘級獲馬數百匹大收鎧仗遂圍城加儀同三司樹勒



兵出戰輒被摧衄遂不敢出自守而已子鵠恐蕭衍遣救乃分兵擊行苞州然州宕州大澗蒙縣等五城並望風逃散樹旣無外援計無所出子鵠又令人說之樹遂請率衆歸南以地還國子鵠等許之共結盟約及樹衆半出子鵠中擊破之擒樹及衍譙州刺史朱文開俘馘甚多班師出帝資馬匹遷吏部尚書轉尚書右僕射尋加驃騎大將軍開府典選初青州人耿翔聚衆反亡奔蕭衍衍資其兵偷據膠州除子鵠使持節侍中青膠大使督濟州刺史蔡儁討之師達青州翔拔城奔走在軍遇病詔遣醫給藥仍除兗州刺史餘官如故便道之州子鵠先遣腹心緣恩民間採察得失及入境太山太守彭穆叅候失儀子鵠責

大同縣志

卷十六 人物

十

讓穆并數其罪狀穆皆引伏於是州內震悚及出帝入關子鵠據城爲逆南青州刺史大野拔徐州人劉粹各率衆就子鵠天平初遣儀同三司婁昭等率衆討之子鵠先使前膠州刺史嚴思達鎮東平郡昭攻陷之仍引兵圍子鵠城久不拔昭以水灌城靜帝欲昭慰下之遣散騎常侍陸琛兼黃門郎張景徵齎璽書勞子鵠而大野拔因與相見左右斬子鵠以降

魏書

婁昭字菩薩代郡平城人也武明皇后之母弟祖父提雄傑有識度家僮千數牛馬以谷量性好周給士多歸附之魏太武時以功封眞定侯父內干有武力未仕而卒昭貴魏朝贈司徒齊受禪追封太原王昭方雅正直有大度深謀腰帶八尺弓馬冠世



神武少親重之昭亦早識人雄曲盡禮敬數隨神武獵每致請  
不宜乘危歷險神武將出信都昭贊成大策卽以爲中軍大都  
督從破爾朱兆於廣阿封安喜縣伯改濟北公又徙濮陽郡公  
授領軍將軍魏孝武將貳於神武昭以疾辭還晉陽從神武入  
洛兗州刺史樊子鵠反以昭爲東道大都督討之子鵠旣死諸  
將勸昭盡捕誅其黨昭曰此州無狀橫被殘賊其君是怨其人  
何罪遂皆捨焉後轉大司馬仍領軍遷司徒出爲定州刺史昭  
好酒晚得偏風雖愈猶不能處劇務在州事委寮屬昭舉其大  
綱而已薨於州贈假黃鉞太師太尉諡曰武齊受禪詔祭告其  
墓封太原王皇建初配享神武廟庭長子仲達嗣改封濮陽王

大同縣志

卷十六

人物

十一

次子定遠少歷顯職外戚中偏爲武成愛狎別封臨淮郡王武  
成大漸與趙郡王等同受顧命位司空趙郡王之奏黜和士開  
定遠與其謀遂納士開賄賂成趙郡之禍其貪鄙如此尋除瀛  
州刺史初定遠弟季畧穆提婆求其伎妾定遠不許因高思好  
作亂提婆令臨淮國郎中令告定遠陰與思好通後主令開府  
段暢率三千騎掩之令侍御史趙秀通至州以贓貨事劾定遠  
定遠疑有變遂縊而死昭兄子獻獻字佛仁父拔魏南部尚書  
獻幼孤被叔父昭所養爲神武帳內都督封掖縣子累遷光州  
刺史在任貪縱深爲文襄所責後改封九門縣公齊受禪得除  
領軍將軍別封安定侯獻無他器幹以外戚貴幸縱情財色爲



瀛州刺史聚斂無厭皇建初封東安王太寧元年進位司空平  
高歸彥於冀州還拜司徒河清三年濫殺人爲尚書左丞宋仲  
羨彈奏經赦乃免尋爲太尉以軍功進大司馬武成至河陽仍  
遣總偏師赴懸瓠獻在豫境留停百餘日專行非法詔免官以  
王還第尋除太尉薨贈大司馬子子產嗣位開府儀同三司北  
齊書

獨孤信雲中人也本名如願魏初有四十六部其先伏留屯者爲  
部落大人與魏俱起祖俟尼和平中以良家子自雲中鎮武川  
因家焉父庫者爲領人酋長少雄豪有節義北州咸敬服之信  
美容儀善騎射正光末與賀拔度等同斬衛可環由是知名後

大同縣志

卷十六

人物

十三

爲葛榮所獲信既少年自修飾服章軍中號爲獨孤郎及爾朱  
氏破葛榮以信爲別將從征韓婁信匹馬挑戰擒賊漁陽王表  
賜周後以破元顥黨賜爵受德縣侯遷武衛將軍賀拔勝出鎮  
荊州乃表信爲大都督及勝弟岳爲侯莫陳悅所害勝乃令信  
入關撫岳餘衆屬周文帝已統岳兵與信鄉里少相友善相見  
甚歡因令信入洛請事至雍州大使元毗又遣信還荊州尋徵  
入朝魏孝武雅相委任及孝武西遷事起倉卒信單騎及之於  
灑澗孝武嘆曰武衛遂能辭父母捐妻子從我世亂識忠良豈  
虛言哉進爵浮陽郡公時荊州雖陷東魏人心猶戀本朝乃以  
信爲衛大將軍都督三荊州諸軍事兼尚書右僕射東南道行



臺大都督荊州刺史以招懷之既至東魏刺史辛纂出戰信縱兵擊纂大敗之都督楊忠等前驅斬纂於是三荆遂定東魏又遣其將高敖曹侯景等奄至信以衆寡不敵遂率麾下奔梁居三載梁武帝方許信還北信父母既在山東梁武帝問信所往答以事君無二梁武義之禮送甚厚大統三年至長安以虧損國威上書謝罪魏文帝付尚書議之七兵尚書陳郡王玄等議以爲既經恩降請赦罪復職詔轉驃騎大將軍加侍中開府尋拜領軍將軍仍從復宏農破沙苑改封河內郡公俘虜中有信親屬始得父凶問乃發喪行服尋起爲大都督與馮翊王元季海入洛陽賴預襄廣陳留之地並欵附四年東魏將侯景等圍

大同縣志

卷十六

人物

十三

洛陽信據金墉城隨方拒守旬有餘日及周文帝至瀍東景等退走信與李遠爲右軍戰不利東魏遂有洛陽六年侯景寇荊州周文令信與李弼出武關景退卽以信爲大使慰撫三荆尋除隴右十一州大都督秦州刺史先是守宰闇弱政令乖方人有冤訟歷年不能斷決及信在州事無擁滯示以禮教勸以耕桑數年之中公私富實流人願附者數萬家周文以其信著遐邇故賜名爲信七年岷州刺史赤水蕃王梁仝定舉兵反詔信討之仝定尋爲其部下所殺而仝定子弟仍收其餘衆信乃勒兵向萬年頓三交谷口賊併力拒守信因詭道趣稠松嶺賊不虞信兵之至望風奔潰乘勝逐北徑至城下賊並出降加授太



于太保芒山之戰大軍不利信與于謹帥散卒自後擊之齊神武追騎驚擾諸軍因此得全及京州刺史宇文仲和據州不愛代周文令信率開府怡峯討之仲和嬰城固守信夜令諸將以衝梯攻其東北信親率壯士襲其西南達明克之禽仲和虜其六千戶送于長安拜大司馬十三年大軍南討時以蠕蠕為寇令信移鎮河陽十四年進位柱國大將軍錄前後功贈封聽回授諸子於是第二子善封魏寧縣公第三子穆必要縣侯第四子藏義寧縣侯邑各一千戶第五子順武成縣侯第六子隋建忠縣伯邑各五百戶信在隴右歲久啟求還朝周文不許或有自東魏來者又告其母凶問信發喪行服信陳哀苦請終禮制

大同縣志

卷十六

人物

十四

又不許於是追贈信父庫者司空公追封信母費連氏常山郡公十六年遣尚書令六官建拜大司馬周孝閔帝踐祚遷大宗伯進封衛國公邑萬戶趙貴誅後信以同謀坐免居無幾晉公護又欲殺之以其名望素重不欲顯其罪過逼令自盡於家時年五十五信美風度雅有奇謀大畧周文初啟霸業唯有關中之地以隴右形勝故委信鎮之既為百姓所懷聲震隣國東魏將侯景之南奔梁也魏收為檄梁文矯稱信據隴右不從宇文氏乃云無關西之憂欲以委梁人也又信在秦州嘗因獵日暮馳馬入城其帽微側詰旦而吏人有戴帽者咸慕信而側帽焉其為隣境及士庶所重如此子羅先在東魏乃以次子善為嗣



及齊平羅至而善卒又以羅立嗣信長女周明敬后第四女元貞后第七女隋文獻后周隋及皇家三代皆爲外戚自古以來未之有也隋文帝踐極乃下詔褒贈信太師上柱國十州諸軍事冀州刺史封趙國公邑一萬戶諡曰景追贈信父庫者使持節太尉上柱國六州諸軍事定州刺史封趙國公邑一萬戶諡曰恭信母費連氏贈太尉趙恭公夫人

北史

杜彥雲中人也父遷屬葛榮之亂徙家於幽彥性勇果善騎射仕周釋褐左待上士後從柱國陸通擊陳將吳明徹於土州破之又擊叛蠻寇倉埵白楊二柵并斬其渠帥進平郢州賊帥樊志以戰功拜大都督尋遷儀同治隆山郡事明年拜隴州刺史賜

大同縣志

卷十六

人物

十五

爵永安縣伯高祖爲丞相從韋孝寬擊尉迴於相州每戰有功賜物三千段奴婢三十口進位上開府改封襄武縣侯拜魏郡太守開皇初授丹州刺史進爵爲公後六歲徵爲左武衛將軍平陳之役以行軍總管與新義公韓擒虎相繼而進軍至南陵賊屯據江岸彥遣儀同樊子蓋率精兵擊破其柵獲船六百餘艘度江擊南陵城拔之擒其守將許翼進至新林與擒虎合軍及陳平賜物五千段粟六千石進位柱國賜子寶安爵昌陽縣公高智慧等之作亂也復以行軍總管從楊素討之別解江州圍智慧餘黨往往屯聚保投溪洞彥水陸兼進攻錦山陽父若石壁四洞悉平之皆斬其渠帥賊李隋擁衆數千聚彭山彥襲



擊破之斬陁傳其首又擊徐州宜豐二洞悉平之賜奴婢百餘口拜洪州總管甚有治名歲餘雲州總管賀婁子幹卒上悼惜者久之因謂侍臣曰榆林國之重鎮安得子幹之輩乎後數日上曰吾思可以鎮榆林者莫過杜彥於是徵拜雲州總管突厥來寇彥輒擒斬之北夷畏憚胡馬不敢至塞後數年朝廷復追錄前功賜子寶虔爵承縣公十八年遼東之役以行軍總管從漢王至營州上以彥曉習軍旅令總統五十營事及還拜朔州總管突厥復寇雲州上令楊素擊走之是後猶恐爲邊患以彥素爲突厥所憚復拜雲州總管未幾以疾徵還卒時年六十子寶虔大業末文城郡丞

隋書

大同縣志

卷十六

人物

六

獨孤羅字羅仁雲中人也父信初仕魏爲荊州刺史武帝之入關也信棄父母妻子西歸長安歷職顯貴羅由是遂爲高氏所囚信後私周爲大司馬及信爲宇文護所誅羅始見釋寓居中山孤貧無以自給齊將獨孤承業以宗族之故見而哀之爲買田宅遺以資畜初信入關之後復娶二妻郭氏生子六人善穆藏順陁整崔氏生獻皇后及齊亡高祖爲定州總管獻皇后遣人尋羅得之相見悲不自勝侍御者皆泣於是厚遺車馬財物未幾周武帝以羅功臣子久淪異域徵拜楚安郡太守以疾去官歸于京師諸弟見羅少長貧賤每輕侮之不以兄禮事也然性長者亦不與諸弟校競長短后由是重之及高祖爲丞相拜儀



同常置左右既受禪下詔追贈羅父信官爵曰褒德累行往代  
通規追遠慎終前王盛典故柱國信風宇高曠獨秀生民獻哲  
居宗清猷映世宏謀長策道著於弼諧緯義經仁事深於拯濟  
方當宣風廊廟亮采台階而運屬難危功高弗賞晷言令範事  
切於心今景運初開椒闈肅建載懷塗山之義無忘褒紀之典  
可贈太師上柱國冀定等十州刺史趙國公邑萬戶其諸弟以  
羅母沒齊先無夫人之號不當承襲上以問后后曰羅誠嫡長  
不可誣也於是襲爵趙國公以其弟善爲河內郡公穆爲金泉  
縣公藏爲武平縣公陔爲武喜縣公整爲千牛備身擢拜羅爲  
左領左右將軍尋遷左衛將軍前後賞賜不可勝計久而出爲

大同縣志

卷十六

人物

七

梁州總管進位上柱國仁壽中徵拜左武衛大將軍煬帝嗣位  
改封蜀國公未幾卒官諡曰恭子纂嗣仕至河陽郡尉纂弟武  
都大業末亦爲河陽郡尉庶長子開遠宇文化及之弑逆也裴  
虔通率賊入成象殿宿衛兵士皆從逆開遠時爲千牛與獨孤  
盛力戰於闔下爲賊所執賊義而捨之善後官至柱國卒子覽  
嗣仕至左候衛將軍大業末卒

隋書

史彥超雲州人也爲人勇悍驍捷周太祖起魏時彥超爲漢龍捷  
都指揮使以兵從太祖入立遷虎捷都指揮使戍于晉州劉昺  
攻晉州州無主帥知州王萬敢不能拒彥超以戍兵堅守月餘  
太祖遣王峻救之昺兵解去以功遷龍捷右廂都指揮使領鄭



州防禦使周漢戰高平彥超爲前鋒先登陷陣以功拜感德軍節度使周兵圍漢太原契丹救漢出忻代世宗遣符彥卿拒之以彥超爲先鋒戰忻口彥超勇憤俱發左右馳擊解而復合者數四遂歿於陣是時世宗取漢高平乘勝而進圍城之役諸將議不一故久無成功世宗欲解去而未決聞彥超戰死遽班師倉卒之際亡失甚衆世宗旣惜彥超而憤無成功憂忿不食者數日贈彥超太師優卹其家焉

五代史

折從阮字可久初名從遠避漢高祖名改爲阮雲中人也其父嗣倫爲麟州刺史從阮爲人溫恭長者居父喪以孝聞唐莊宗鎮太原以爲牙將後以爲府州刺史晉出帝與契丹拜盟從阮以

大同縣志

卷十六

人物

六

兵攻契丹取其城堡十餘遷本州團練使兼領朔州刺史安北都護振武軍節度使契丹西南面行營馬步軍都虞侯漢高祖人立於府州建永安軍以從阮爲節度使明年以其族朝京師徙鎮武勝卽拜從阮子德晟爲府州團練使周太祖入立從阮歷徙宣義保義靜難三鎮顯德二年罷還京師行至洛陽卒贈中書令

五代史

折德晟世居雲中爲大族父從阮自晉漢以來獨據府州控扼西北中國賴之仕周至靜難軍節度使其鎮府州時署德晟爲馬步軍都校廣順間周世宗建府州爲永安軍以德晟爲節度使時從阮鎮邠寧父子俱領節鎮時人榮之顯德中德晟率師攻



下河市鎮斬并軍五百餘級入朝以其弟德愿權總州事時世宗南征還次通許橋德展迎謁且請遷內地世宗以其素得番情不許厚加賜賚而遣之德展未至德愿又破并軍五百餘于沙谷若斬其將郝章張釗宋初德展又破河東沙谷若斬首五百級建隆二年來朝待遇有加遣歸鎮乾德元年敗太原軍于城下擒其將楊璘二年卒年四十八贈侍中子御勳御卿

宋史

御勳字世隆德展鎮府州日表爲右職德展卒以御勳領汾州團練使權知府州事開寶二年太祖征太原御勳詣行在謁見以爲永安軍留後四年以郊祀來朝禮畢歸鎮九年郊祀西洛復來朝道病後期改泰寧節度使留京師太平興國二年卒年四

大同縣志

卷十六

人物

九

十贈侍中

宋史

御卿幼補節院史御勳知州事署爲兵馬都校御勳徙鎮召爲副廐副使知府州太宗征河東命御卿與尹憲領屯兵同攻嵐州又破岢嵐軍擒其軍使折令圖以獻遂下嵐州又殺其憲州刺史霍翊又擒其將馬延忠等七人遷崇儀使淳化三年凡四遷而爲府州觀察使五年拜永安軍節度使旣而契丹衆萬餘入寇御卿大敗之於子河汭斬首五千級獲馬千匹契丹將號突厥太尉司徒舍利死者二十餘人擒其吐渾一人自是契丹知所畏太宗因遣使問御卿曰西北要害皆屯勁兵戎人何自而至御卿對曰敵緣山峽小徑入謀剽畧臣諜知之遣人邀其歸



路因縱兵大擊敗走之人馬墜崖谷死者相枕其大將韓德威僅以身免皆聖靈所及非臣之功也上嘉之歲餘御卿被病德威謀知之且爲李繼遷所誘率衆來侵以報子河漢之役御卿力疾出戰德威聞其至不敢進會疾甚其母密遣人名歸御卿曰世受國恩邊寇未滅御卿罪也今臨敵棄士卒自便不可死於軍中乃其分也爲白太夫人無念我忠孝豈兩全言訖泣下翊日卒年三十八上聞悼惜久之贈侍中以其子惟正爲洛苑使知州事惟正歸朝以其弟惟昌繼之咸平二年河西黃女族長蒙異保及惟昌所部啜訛引趙保吉之衆入寇麟州萬戶谷進至松花砦惟昌與從叔同巡檢使海超弟供奉官惟信率兵

大同縣志

卷十六

人物

二十

赴戰會保吉兵衆官軍不敵惟昌臂中流矢墜馬攝弓超得裨將馬突圍出海超惟信沒焉九月保吉黨萬私保移埋復來寇惟昌與宋思恭劉文質合戰于埋并峯敗走之又破言泥族拔黃砦焚其器甲車帳俘斬甚衆以功領富州刺史改文思使景德元年與王萬海等破賊砦護芻糧抵麟州秋入朔州界破狼水砦時契丹方圍岢嵐軍聞敗遁去明年拜興州刺史大中祥符二年表求赴闕真宗命近臣與射於苑中宴賜甚厚上言先臣御卿蒙賜旗三十杆以壯軍容請別給賜許之七年命河東民運糧赴麟州當出兵爲援惟昌力疾領步騎屯寧遠砦冒風沙而行時疾已亟猶與賓佐宴飲談笑自若焉明日卒年三十



七以其弟惟忠繼之惟忠字蓋臣初以兄惟信戰沒補西頭供奉官擢闔門祇候及惟昌卒以惟忠爲六宅使知府州兼麟府路都巡檢使領普州刺史再遷左藏庫使真拜嘉州刺史改資州進簡州團練使喪母起復雲麾將軍卒惟忠知兵事天聖中契丹與夏國會兵境上聲言嫁娶惟忠覘得其實率麾下往備之戒士卒毋輕動一夕風霾有騎走營中以爲寇至惟忠堅卧不動徐命擒之得數誕馬蓋虜所縱也旣卒錄其弟姪子孫七人以其子繼宣嗣州事久之特贈惟忠耀州觀察使寶元中繼宣坐苛虐掊刻種落嗟怨紬爲左監門衛將軍楚州都監擢其弟右侍禁繼閔爲西京作坊使嗣州事繼閔子廣孝慶厯中元

大同縣志

卷十六

人物

三

昊兵攻麟州不克進圍州城城險且堅東南有水門厓壁峭絕阻河賊緣厓腹微徑魚貫而前城中矢石亂下賊轉攻城北士卒復力戰賊死傷甚衆遂引去圍豐州豐州遂陷繼閔以城守勞特遷宮苑使普州刺史未幾護送麟州戍卒冬服賊伏兵邀擊之盡掠所齎繼閔脫身繇間道歸會赦止奪宮苑使後復官領果州團練使自元昊反繼閔招輯歸業者三千餘戶皇祐二年卒以其弟繼祖嗣州事繼祖字應之由右侍禁遷西染院使累轉皇城使成州團練使臨政二十餘年奏乞書籍仁宗賜以九經韓絳發河東兵城囉兀繼祖爲先鋒深入敵帳降部落戶八百加解州防禦使卒繼祖有子當襲州事請以授兄之子克



柔詔從之而進其三子官錄二孫爲借職弟繼世少從軍爲延州東路巡檢嵬名山之內附繼世先知之遣其子克勤報种諤諤用是取綏州繼世以騎步萬軍于懷寧砦入晉祠谷往銀川分名山之衆萬五千戶居於大理河夏人來攻再戰皆捷諤抵罪逮繫獄以兵付之而行遂同名山守綏州錄功領忠州刺史說韓絳城囉兀以撫橫山因畫取河南之策絳以爲然以左驥驥使果州團練使卒諸司使無賻禮詔以繼世蕃官捍邊有績特給之從子克行

宋史

克行字遵道繼閔子也初仕軍府無所知名夏人寇環慶种諤拒之詔河東出師爲援克行請往諤使以兵三千護餉道戰于葭

大同縣志

卷十六

人物

三

蘆川先登斬級四百降戶千馬畜萬計諸老將矍然曰真折太尉子也擢知府州秦兵討夏國張世矩將河外軍民克行與俱廷儀謂守臣難自行詔克行選兵隸世矩克行抗章願自率部落先驅未報卽委管鑰而西大酋咩保吳良以萬騎來躡克行爲後拒度賊半度隘縱擊大破之殺咩保吳良師還自劾釋不問王中正出塞克行先拔宥州每出必勝夏人畏之益左廂兵專以當折氏太原孫覽議城葭蘆諸將論多不合召克行問策卽頓兵吐渾河約勒部伍爲深入窮討之狀敵疑不敢動旣訖役又入津慶龍橫川斬級三千詔河東進築八砦通道郵延延帥遣秦希甫來共議克行請兩路併力以遠者爲先希甫曰由



近及遠法也克行曰不然事有奇正今乘士氣之銳所利在速  
故先遠役以出其不意若徐圖之士心且怠矣希甫持不可并  
上二議卒用克行策城成謀言寇至軍中皆戒嚴克行止之曰  
彼自擾耳已而果然克行在邊三十年善拊士卒戰功最多羌  
人呼爲折家父官至秦州觀察使卒贈武安軍節度使子可大  
爲榮州團練使知府州從子可適可適未冠有勇馳射不習而  
能鄜延郭達見之嘆曰眞將種也薦試廷中補殿侍隸延州從  
種諤出塞遇敵馬以少年易之可適索與鬪斬其首取馬而還  
益知名米脂之役與夏人戰三角嶺得級多又敗之於蒲桃谷  
東兵久不得食千人成聚藉藉于軍門或欲擁殺以爲功可適

大同縣志

卷十六

人物

三

曰此以饑而逃耳非叛也單馬出詰之曰爾輩何至是不爲父  
母妻子念而甘心爲異域鬼耶皆回面聲啞流涕謝再生各遣  
歸羌夏人十萬入寇可適先得其守烽卒姓名詐爲首領行視  
呼出盡斬之烽不傳因卷甲疾趨大破之于尾丁磴回次標楊  
溝正午駐營分騎據西山曰彼若躡吾後腹背受敵必敗果舉  
軍來可適所部纔八千轉戰至高嶺迺從間道趨洪德設伏邀  
其歸路敵至伏發衝之其國母踰山而遁焚棄輜重雖帷帳首  
飾之屬亦不返衆相蹈蹂死者如積論前後功至皇城  
使成州團練使知岷蘭州鎮戎軍渭州兼秦合熙秦慶三道兵  
築好水川命總管王文振視之而可適將軍益副熙州兵千人



夫道盡死文振歸罪於可適棗卽下之吏宰相章惇欲按軍法  
哲宗不許猶削十三官而罷棗請留以責效乃以權第十二將  
嵬名阿埋昧勒都逋皆夏人桀黠用事者詔可適密圖之會二  
酋以畜牧爲名會境上可適謀知之遣兵夜往襲并俘其族屬  
三千人遂取天都山帝爲御文德殿受賀以其地爲西安州遷  
可適東上闔門使洛州防禦使涇原鈐轄知州事真拜和州防  
禦使進明州觀察使爲副都總管帥鍾傳行邊爲敵所隔以輕  
騎拔之得歸傳議取靈武環慶亦請出師命可適將萬騎往卽  
薄靈州川夏人扶老挾穉中夜入州城明日俘獲甚夥而慶兵  
不至乃引還詔使入覲帝以傳策訪焉對曰得之易守之難當

大同縣志

卷十六

人物

一十四

先侵弱其地待吾藩籬旣固然後可圖帝曰卿言是也進武安  
軍節度觀察留後步軍都虞侯大城蕭關與傳議齟齬會覆師  
數百于踏口傳劾之貶鄭州觀察使俄知衛州拜淮康軍節度  
使轉運使請于平夏通峽鎮戎西安四砦分築塲圃置芻粟五  
百萬可適以費大難之又欲借車牛以運及致十萬斛於熙河  
皆及其意乃中以疑謗名爲佑神觀使明年復以爲渭州命其  
子彥質直祕閣叅軍事數月而卒年六十一彥質紹興中簽書

樞密院別有傳

宋史

畢士安字仁叟代州雲中人曾祖宗昱本縣令祖球本州別駕父  
又林累辟使府終觀城令因家焉士安少好學事繼母祝氏以



孝聞祝氏曰學必求良師友乃與如宋又如鄭得楊環韓丕劉錫爲友因爲鄭人乾德四年舉進士邠帥楊廷璋辟幕府掌書奏問寶四年歷濟州團練推官專掌筭權歲課增羨改兗州觀察推官太平興國初爲大理寺丞領三門發運事吳越錢俶納上選知台州言錢氏上圖籍有司皆張修賦數今湖海新民始得天子命吏宜有安輯願一用舊籍詔從之明年遷左贊善大夫徙饒州改殿中丞召還爲監察御史復出知乾州以母老願降任就養改監汝州稻田務雍熙二年諸王出閣領擇僚屬以虞部郎中王龜從兼陳王府記室參軍水部員外郎王素兼韓王府記室參軍祕書丞張茂直兼益王府記室參軍士安遷左

大同縣志

卷十六

人物

三五

拾遺兼冀王府記室參軍太宗名謂曰諸子生長宮庭未聞外事年漸成人必資良士贊導使日聞忠孝之道卿等勉之賜襲衣銀帶鞍勒馬士安本名士元以元犯王諱遂改焉遷考功員外郎端拱中詔王府寮屬各獻所著文太宗閱視累日問近臣曰其才已見矣其行孰優或以士安對上曰正協朕意俄以本官知制誥王請對願留府邸不許淳化二年召入翰林爲學士大臣以張洎薦太宗曰洎視墨士安詞藝踐歷固不減但履行遠在下爾士安以父名父林抗章引避朝議謂二名不偏諱不聽三年與蘇易簡同知貢舉加主考官中以疾請外改右諫議大夫知穎州眞宗以壽王尹開封府召爲判官及爲皇太子以



兼右庶子遷給事中登位命權知開封府事拜工部侍郎樞密直學士時近臣有怙勢強取民間定婚女其家訴於府士安因對奏還之宮府常從爲廷職者每授任於外必令士安戒勗咸平初辭府職拜禮部侍郎復爲翰林學士詔選官校勘三國志晉唐書或有言兩晉事多鄙惡不可流行者眞宗以語宰相上安曰惡以戒世善以勸後善惡之事春秋備載眞宗然之遂命刊刻士安以目疾求解改兵部侍郎出知潞州特加月給之數入爲翰林侍讀學士景德初兼秘書監契丹謀入境士安首疏五事應詔陳選將餉兵理財之策眞宗加納李沆卒進士安吏部侍郎參知政事入謝眞宗曰未也行且相卿士安頓首眞宗

曰朕倚卿以輔相豈特今日然時方多事求與卿同進者其誰可對曰宰相者必有其器乃可居其位臣駑朽實不足以勝任寇準兼資忠義善斷大事此宰相才也眞宗曰聞其好剛使氣又對曰準方正慷慨有大節忘身徇國秉道疾邪此其素所蓄積朝臣罕出其右者第不爲流俗所喜今天下之民雖蒙休德涵養安佚而西北跳梁爲邊境患若準者正所宜用也眞宗曰然當藉卿宿德鎮之未閱月以本官與準同拜平章事士安兼監修國史居準上準爲相守正嫉惡小人口思所以傾之者布衣申宗古告準交通安王元傑準皇恐莫知所自明士安力辯其誣下宗古吏具得姦罔斬之準乃安景德元年九月契丹統



軍撻覽引兵分掠威虜順安北平侵保州攻定武數為諸軍所却益東駐陽城淀遂攻高陽不得逞轉窺貝冀天雄兵號二十萬真宗坐便殿問策安出士安與寇準條所以禦備狀又合議請真宗幸澶淵士安言澶淵之行當在仲冬準謂當亟往不可緩卒用士安議初咸平六年雲州觀察使王繼忠戰陷契丹至是為契丹奏請議和大臣莫敢如何獨士安以為可信力贊真宗當羈縻不絕漸許其成真宗謂敵悍如此恐不可保士安曰臣嘗得契丹降人言其雖深入屢挫不甚得志其陰欲引去而恥無名且彼寧不畏人乘虛覆其巢穴此請殆不妄繼忠之奏臣請任之真宗喜手詔繼忠許其請和時已詔巡幸而議者猶

闕闕二三大臣有進金陵及成都圖者士安亟同準請對力陳其不可惟堅定前計真宗嚴兵將行太白晝見流星出上台北貫斗魁或言兵未宜北或言大臣應之士安適卧疾遺書準曰屢請昇疾從行手詔不許今大計已定唯君勉之士安得以身當星變而就國事必所願也已而少間追至澶淵見于行在時已發兵數十萬契丹大震猶乘衆掠德清至澶北鄙為伏弩發射撻覽死衆潰遁去會曹利用自契丹使還具得要領又與其使者姚東之俱來講和之議遂定歲遺契丹銀絹三十萬朝論皆以為過士安曰不如此契丹所顧不重和事恐不能久及罷兵從還乃按邊要選良守將易置之雄州以李允則定州馬知



節鎮州孫全照保州楊延昭它所擇用各得其任令塞上得境  
外牛馬類者悉還之通互市除鐵禁招流亡廣儲蓄未幾夏州  
趙得明亦款塞內附二方既定中外畧安量時制法次第施行  
復置賢良方正直言極諫等科以廣取士二年章七八上以病  
求免優詔不允遣使敦諭不得已復起視事十月晨朝至崇政  
殿廬疾暴作真宗步出臨視已不能言詔內侍寶神寶以肩輿  
送歸第卒年六十八車駕臨哭廢朝五日贈太傅中書令謚文  
簡以皇城使衛紹欽治葬有司給鹵簿錄其子世長爲太子中  
舍慶長爲大理寺丞孫從古爲將作監主簿士安端方沉雅有  
清識醞籍美風采善談吐所至以嚴正稱年耆目眊讀書不輟

大同縣志

卷十六 人物

二十六

手自櫛校或親繕寫又精意詞翰有文集三十卷嘗謂人曰僕  
仕宦無赫赫之譽但力自規檢庶幾寡過爾凡交游無黨援惟  
王祐呂端見引重王旦寇準楊億相友善王禹偁陳彭年皆門  
人也禹偁濟州人幼時以事至士安官舍士安識其非常重留  
之教以學舉業日顯後遂登科進用更在士安前及士安知制  
誥其命乃禹偁詞也士安沒後真宗謂寇準等曰畢士安善人  
也事朕南府東宮以至輔相飭躬慎行有古人之風遽此淪沒  
深可悼惜及王旦爲相面奏陛下前稱畢士安清慎如古人在  
位聞之感歎仕至輔相而四方無田園居第沒未終喪家用已  
屈真不負陛下所知然使其家假貸爲生宜有以周之者竊謂



當出上恩非臣敢為私惠真宗感歎賜白金五千兩子世長至  
衛尉卿慶長至大府卿孫從善光祿少卿從古駕部郎中從厚  
從誨檢校水部員外郎從簡傳羅令從道殿中丞從範山南西  
道節度推官從益太常寺太祝從周朝散郎知洋州曾孫仲達  
仲偃仕至郡守仲衍仲游仲愈

宋史

仲衍字夷仲以蔭為陽翟主簿張昇縣人也方鎮許請於朝與興  
鄉校既具材計工又聽民自以其力輸助邑子馬宏以口舌橫  
閭里謾謂諸豪曰張公興學而縣令乃因以取諸民由十百而  
至千萬未已也君將不堪誠捐百金予我我能止役豪信其能  
予百金宏即詣府宣言縣吏盡私為學之費又將賦與民昇果

大同縣志

卷十六

人物

三

疑焉敕縣且止又揭其事於道令欲上疏辯仲衍曰亡益也不  
如取宏治之不辯自直矣會攝縣事即逮捕驗治五日得其姦  
言于昇流宏鄧州一縣相賀給事中張問居里中謂仲衍曰諺  
云鋤一惡長十善君之謂也舉進士中第調沈邱令歐陽修呂  
公著薦之入司農為主簿升丞吳充引為中書檢正奉使契丹  
宴射連破的衆驚異之且偉其姿容密使人取其衣為度製服  
以賜時預其元會盡能記其朝儀節奏圖畫歸獻後錢勰出使  
契丹主猶問畢少卿何官今安在王瑾與充不相能以仲衍為  
充所用數求罪過欲傷之卒無可乘但留滯不遷經四年乃以  
秘閣校理同知太常禮院為官制局檢討官制文字千萬計區



別分類損益刪補皆曲盡其當凡從中間其事必須沖衍然後報他人不知也撰中書備對三十卷士大夫家爭傳其書高麗使入貢詔管之上元夕與使者宴東闕下作詩誦聖德神宗次韻賜焉當時以為寵官制行帝自擢起居郎王珪留除命謂為太峻爭於前帝連稱曰是當得爾未幾暴得疾一夕卒年四十三帝遣中使唁其家賻錢五十萬

宋史

仲游字公叔與仲衍同登第調壽邱柘城主簿羅山令環慶轉運司幹辦公事從高遵裕西征運期迫遠陝西八十縣餽輓之夫三十萬一旦悉集轉運使范純粹李察度受其賦而給之食必曠日乃可會僚屬議皆不知所為以委仲游仲游集諸縣吏令

大同縣志

卷十六

人物

三

先効金帛緡錢之最戒勿啟局鑄共簿其名數以為質預飭其斛量數千洞徹倉庾牆壁使贏糧者至其所人自斛槩輸其半而以半自給不終朝霍然而散期日大軍遂行純粹察歎且謝曰非君幾敗吾事元祐初為軍器衛尉丞召試學士院同策問者九人乃黃庭堅張來晁補之輩蘇軾異其文擢為第一加集賢校理開封府推官出提點河東路刑獄韓縝以故相在太原按視如列郡縝奴告有卒剽其衣於公堂之側縝怒將寘卒於獄理冲游曰奴衣服褻薄而敢掠之於帥牙非人情也取以付獄治卒得免太原銅器名天下獨不市一物懼人以為矯也日行賈二茶七而去縝曰如公叔可謂真清矣召拜職方司勳一員



外郎改秘閣校理知耀州是歲大旱仲游先民之未饑揭喻境  
內曰郡賑施與平糶若干萬石實虛張其數富室知有備亦相  
勸發廩凡民就食者十七萬九千口無一人去其鄉徽宗時歷  
知鄭鄆二州京南淮南轉運副使人爲吏部郎中言孔子廟自  
顏回以降皆爵命於朝冠冕居正而子鯉孫伋乃野服幅巾以  
祭爲不稱詔皆追侯之仲游早受知於司馬光呂公著不及用  
范純仁尤知之當國時又適居母喪故未嘗得尺寸進然以墮  
黨籍坎壈散秩而終年七十五仲游爲文切於事理而有根柢  
不爲浮誇讒誕戲弄不莊之語蘇軾在館閣頗以言語文章規  
切時政仲游憂其及禍貽書戒之曰孟軻不得已而後辯孔子

大同縣志

卷十六

人物

三

欲無言古人所以精謀極慮固功業而養壽命者未嘗不出乎  
此君自立朝以來禍福利害繫身者未嘗言顧直惜其言爾夫  
言語之累不特出口者爲言其形于詩歌贊于賦頌託于碑銘  
著于序記者亦言語也今知畏於口而未畏於文是其所是則  
見是者喜非其所非則蒙非者怨喜者未能濟君之謀而怨者  
或以敗君之事矣天下論君之文如孫臏之用兵扁鵲之醫疾  
固所指名者矣雖無是非之言猶有是非之疑又况其有邪官  
非諫臣職非御史而非是人所未是危身觸諱以游其間殆猶  
抱石而拯溺也司馬光爲政反王安石所爲仲游予之書曰昔  
安石以興作之說動先帝而患財之不足出故凡政之可以得



民財者無不用盡散青苗置市易斂役錢變鹽法者事也而欲興作患不足者情也苟未能杜其興作之情而徒欲禁其散斂變置之事是以百說而百不行今遂廢青苗罷市易蠲役錢去鹽法凡號爲利而傷民者一掃而更之則向來用事於新法者必不喜矣不喜之人必不但曰青苗不可廢市易不可罷役錢不可蠲鹽法不可去必操不足之情言不足之事以動上之雖致石人而使聽之猶將動也如是則廢者可復散罷者可復置蠲者可復斂去者可復存矣則不足之情可不預治哉爲今之策當大舉天下之計深明出入之數以諸路所積之錢粟一歸地官使經費可支二十年之用數年之間又將十倍於今日使

天子曉然知天下之餘於財也則不足之論不得陳於前然後所論新法者始可永罷而不可行矣昔安石之居位也中外莫非其人故其法能行今欲掾前日之倣而左右侍職司使者十有七八皆安石之徒雖起二三舊臣用六七君子然累百之中存其十數烏在其勢之可爲也勢未可爲而欲爲之則青苗雖廢將復散况未廢乎市易雖罷且復置况未罷乎役錢鹽法亦莫不然以此掾前日之倣如人久病而少間其父子兄弟喜見顏色而未敢賀者以其病之猶在也光軾得書聳然竟如其慮仲愈歷國子監丞諸王府侍講知鳳翔府坐兄仲游陷黨籍例廢黜繼宗曰畢仲衍被遇死帝可除罪籍以仲愈爲都管郎中



擢秘書少監卒 宋史

李漢超雲州雲中人始事鄴帥范延光不爲所知又事鄴帥高行周亦不見親信會周世宗鎮澶淵漢超遂委質焉卽位補殿前指揮使三遷殿前都虞侯宋初改散指揮都指揮使領綿州刺史累遷控鶴左廂都校領恩州團練使從平李重進等遷齊州防禦使兼關南兵馬都監漢超仕關南人有訟漢超強取其女爲妾及貸而不償者太祖召而問之曰汝女可適何人曰農家也又問漢超未至關南契丹如何曰歲苦侵暴曰今復爾邪曰否太祖曰漢超朕之貴臣也爲其妾不猶愈於農婦乎使漢超不守關南尚能保汝家之所有乎責而遣之密諭漢超曰亟還

大同縣志 卷十八 人物

三

其女并所貸朕姑貰汝勿復爲也不足於用何不以告朕邪漢超感泣誓以死報在郡十七年政平訟理吏民愛之詣闕求立碑頌德太祖詔率更令徐鉉撰文賜之霸州監軍馬仁瑀嘗兄事漢超多自肆擅發麾下卒入遼境剽奪人口羊馬由是二將交惡太祖慮其生變遣中使賜漢超仁瑀金帛令和解之太平興國初遷應州觀察使判齊州仍爲關南巡檢二年八月卒於屯所太宗甚悼惜贈太尉忠武軍節度中使護葬漢超善撫士卒與之同甘苦死之日軍中皆流涕子守恩 宋史

李守恩少驍果善戰有父風初補齊州牙職開寶二年太祖親征太原漢超爲北面行營都監守恩從父軍中會契丹遣兵援河



東至定州西嘉山將入土門守恩領牙兵數千騎戰敗之斬首三千級獲戰馬器甲甚衆擒首領二十七人隨漢超見于行在賜戎服金帶器帛緡錢太祖謂左右曰此稚子能若是他日將帥才也漢超卒擢為驍猛軍校累官至隴州刺史知靈州與轉運使陳緯部芻糧過瀚海為賊所邀守恩及子廣文助教象之隴州衙內指揮使望之弟寄班守忠皆沒真宗聞之震悼特贈守恩洪州觀察使次子祐之順之用之潤之慶之成之藏之宋史陳昭衮小字王九雲州人工譚緹勇而善射統和中補祗仔郎君為奚拽刺詳穩累遷敦睦宮太保兼掌圍場事開泰五年秋大獵帝射虎以馬馳太速矢不及發虎怒奮勢將犯蹕左右辟易

大同縣志卷十六

人物

三

昭衮捨馬捉虎兩耳騎之虎駭且逸上命衛士追射昭衮大呼止之虎雖軼山昭衮終不墜地伺便拔佩刀殺之輦至上前慰勞良久即日設燕悉以席上金銀器賜之特加節鉞遷圍場都太師賜國姓命張儉呂德懋賦以美之遷歸義軍節度使同知上京留守歷西南面招討都監卒

遼史

康元弼字輔之大同雲中人幼敏學普屬文登正隆二年進士第調汝陽簿改崇義軍節度判官由垣曲縣令補尚書省令史累遷同知河北西路轉運使事名為大理丞大定二十七年河決曹濮間瀕水者多墊溺朝廷遣元弼往視相其地如盜而城在盜中水易為害請命於朝以徙之卒收築於北原曹人賴焉出



爲宏州刺史閱歲授大理少卿先是衛城爲河所壞增築蘇門以寓州治水旣退民不樂遷欲復歸衛於是遣元弼按視還言治故城便遂復其舊轉秘書少監兼著作郎改通州刺史兼領漕事章宗立尊孝懿皇后爲皇太后以元弼舊臣召充副衛尉再轉大理卿以喪去起復爲尚書刑部侍郎兼鄆王傅遷南京路轉運使承安三年致仕卒

金史

按竺邇雍古氏其先居雲中塞上父黜公爲金羣牧使歲辛未驅所牧馬來歸太祖終其官按竺邇幼鞠于外祖朮要甲家訛言爲趙家因姓趙氏年十四隸皇子察合台部嘗從大獵射獲數麋有二虎突出射之皆死由是以善射名皇子深器愛之甲戌

大同縣志

卷十六

人物

三五

太祖西征尋思干阿里麻里等國以功爲千戶丁亥從征積石州先登拔其城圍河州斬首四十級破臨洮攻德順斬首百餘級攻鞏昌駐兵秦州太宗卽位尊察合台爲皇兄以按竺邇爲元帥戊子鎮刪丹州自墩煌置驛抵玉關通西域從定關隴辛卯從圍鳳朔按竺邇分兵攻西南隅城上礮石亂下選死士先登拔其城斬金將劉興哥分兵攻西河州宋將彊俊領衆數萬堅壁清野以老我師按竺邇率死士罵城下挑戰俊怒悉衆出陣按竺邇佯走俊追之因以奇兵奪其城伏兵要其歸轉戰數十里斬首數千級擒俊餘衆退保仇池進擊拔之從拔平涼慶陽邠原寧皆降涇州復叛殺守將郭元恕衆議屠之按竺邇但



誅首惡帥還原州降民棄老幼夜亡走衆曰此必反也宜誅之  
以警其餘按竺邇曰此輩懼吾驅之北徙耳遣人諭之曰汝等  
若走以軍法治罪父母妻子併誅矣汝歸保無他明年草青具  
牛酒迎師於此州民皆復歸豪民陳苟集數千人潛新寨諸洞  
衆議以火攻之按竺邇曰招諭不出攻之未晚遂偕數騎抵寨  
縱馬解弓矢各苟遙語折矢與爲誓苟卽相呼羅拜謝更生之  
恩皆降金人守潼關攻之戰于扇車回不克睿宗分兵由山南  
入金境按竺邇爲先鋒趣散關宋人已燒絕棧道復由兩當縣  
出魚關軍海州宋制置使桂如淵守興元按竺邇假道於如淵  
曰宋讐金久矣何不從我兵鋒一洗國恥今欲假道南鄭由金  
洋達唐鄧會大兵以滅金豈獨爲吾之利亦宋之利也如淵度  
我軍壓境勢不徒還遂遣人導我師由武休關東抵鄧州西破  
小關金人大駭謂我軍自天而下其平章完顏合達樞密使移  
剌蒲阿帥十七都尉兵數十萬相拒于鄧我師不與戰直趣鈞  
州與親王按赤台等兵合陣三峯山下會天大雪金兵成列按  
竺邇先率所部精兵迎擊於前諸軍乘之金師敗績癸巳金主  
奔蔡十二月從圍蔡甲午金亡初金將郭斌自鳳翔突圍出保  
金蘭定會四州至是命按竺邇往取之圍斌于會州食盡將走  
敗之于城門兵入城巷戰死傷甚衆斌手劒驅其妻子聚一室  
焚之已而自投火中有女奴自火中抱兒出泣授人曰將軍盡



忠忍使絕嗣此其兒也幸哀而收之言畢復赴火死按竺邇聞之惻然命保其孤遂定四州金將汪世顯守鞏州皇子開端圍之未下遣按竺邇等往招之世顯率衆來降皇兄嘉其材勇賞資甚厚賜名拔都拜征行大元帥丙申大軍伐蜀皇子出大散關分兵令宗王穆直等出陰平郡期會于成都按竺邇領砲手兵爲先鋒破宕昌殘階州攻文州守將劉祿數月不下謀知城中無井乃奪其汲道率勇士梯城先登殺守陴者數十人遂拔其城祿死之因招徠吐蕃酋長勘陁孟迦等十族皆賜以銀符畧定龍州遂與大散軍合進克成都師還而成都復叛丁酉按竺邇言於宗王曰隴州縣方平人心猶貳西漢陽當隴蜀之衝

大同縣志

卷十六

人物

三七

宋及吐蕃利於入寇宜得良將以鎮之宗王曰安反側制寇賊此上策也然無以易汝遂分蒙古千戶五人隸麾下以往按竺邇命和尚南戍沔州之石門尤魯西戍階州之兩水謹斥侯嚴巡邏西南諸州不敢犯之戊戌從元帥塔海率諸翼兵伐蜀克隆慶己亥攻重慶庚子圖萬州宋人將舟師數百艘遡流迎戰按竺邇順流率勁兵乘巨筏浮草舟於其間弓弩兩射宋人不能敵敗諸夔門辛丑伐西川破二十餘城成都守將田顯開北門以納師宋制置使陳隆之出奔追獲之縛至漢州令誘降守將王夔夔不降進兵攻之夔夜驅火牛突圍出奔遂斬隆之王夔會六軍破遂寧瀘敘等州癸亥破資州庚戌按竺邇安輯涇



邠二州宋制置使余玠攻興元文州降將王德新乘隙自階州  
叛執扈牛二鎮將領衆千餘走江油憲宗召按竺邇還舊營按  
竺邇遣將直擣江油奪扈牛以歸中統元年世祖卽位親王有  
異謀者其將阿藍答兒渾都海圖據關隴時按竺邇以老委軍  
於其子帝遣宗王塔丹哈必赤阿曷馬西討按竺邇曰今內難  
方殷浸亂關隴豈臣子安卧之時耶吾雖老尚能被賊遂引兵  
出刪丹之耀碑谷從阿曷馬與之合戰會大風晝晦戰至晡大  
敗之斬馘無算按竺邇與總師汪良臣獲阿藍塔兒渾都海等  
捷聞帝賜璽書褒美賜弓矢錦衣四年卒六十九延祐元年賜  
推忠佐運功臣太保儀同三司上柱國封秦國公諡武宣子十

大同縣志

卷十六

人物

三

人徹理國寶最知名徹理襲職爲元帥丁巳從父攻瀘州降宋  
將劉整宋將姚德壁雲頂山戊午大軍圍之徹理率部兵由水  
門先登破其壁德降後以病廢卒國寶一名黑梓少擊劍學書  
侗儻好義有謀畧父爲元帥軍務悉以委之故所至多捷從攻  
重慶降宋都統張實併掠合州以歸中統元年從攻阿藍答兒  
有功阿藍答兒叛將大都據吐蕃之點西嶺國寶攝帥事討之  
衆欲速戰國寶曰此窮寇也宜少緩以計破之遂以精兵襲其  
後大都欲西走國寶據險要之挑戰則歛兵自固相持兩月潛  
兵出其不意擒殺之捷聞賜弓矢金綺初按竺邇之告老制命  
徹理襲征行元帥徹理以疾不視事國寶乃謂諸弟曰昔我先



人耀兵西陲大功既集關隴雖寧而西戎未靖此吾輩立功之秋也乃遣謝鼎與弟國能持金帛說降吐蕃酋長勘陁孟迦從國寶入覲國寶奏曰文州山川險阨控庸蜀拒吐蕃宣城文州屯兵鎮之從之授國寶三品印爲蒙古漢軍元帥兼文州吐蕃萬戶府達魯花赤與勘陁孟迦皆賜金符時扶州諸羌未附國寶宣上威德於是呵哩禪波哩揭諸酋長皆歸款從國寶入覲國寶圖山川形勢以獻詔授呵哩禪波哩揭爲萬戶賜金虎符諸酋長爲千戶皆賜金符賜國寶金幣國寶治文州有善政至元四年卒延祐元年贈推誠佐理功臣光祿大夫平章政事柱國封梁國公諡忠定子世榮世延初國寶將卒以世榮幼命弟

大同縣志

卷十六

人物

三五

國安襲其職國安既襲蒙古漢軍元帥兼文州吐蕃萬戶府達魯花赤後以其兄國寶安邊功賜金虎符進昭勇大將軍十五年討叛王吐魯于六盤獲之請解職授世榮帝曰人爭而汝讓可以敦薄俗錄其六盤功進昭毅大將軍招討使世榮襲懷遠大將軍蒙古漢軍元帥兼文州吐蕃萬戶府達魯花赤後以功淮安遠大將軍吐蕃宣慰使議事都元帥佩三珠虎符世延中書平章政事

元史

趙世延字子敬其先雍古族人居雲中北邊曾祖黜公爲金羣牧使太祖得其所牧馬黜死之祖按竺邇幼孤鞠於外大父朮要

爲趙家因氏爲趙驍勇善騎射從太祖征伐有功爲蒙古



漢軍征行大元帥鎮蜀因家成都父黑梓以門功襲父元帥職兼文州吐蕃萬戶達魯花赤世延天資秀發喜讀書究心儒者體用之學弱冠世祖召見俾入密樞院御使臺肄習官政至元二十一年授承事郎雲南諸路提刑按察司判官時年二十有四爲蒙蠻酋叛世延會省臣以軍討之蠻兵大潰卽請降二十六年擢監察御史與同列五人劾丞相桑哥不法中丞趙國輔桑哥黨也抑不以聞更以告桑哥於是五人者悉爲其所擠而世延獨幸免奉旨按平陽郡監也先忽都贓鉅萬鞠左司郎中董仲威殺人獄皆明允二十九年轉奉議大夫出僉江南湖北道肅政廉訪司事敦儒學立義倉撤淫祠修灋陽縣壞隄嚴常

灋掠賣良民之禁部內晏然元貞元年除江南行御史臺都事丁內艱不赴大德元年復除前官三年移中臺都事俄改中書左司都事臺臣奏仍爲都事中臺六年由山東肅政廉訪副使改江南行臺治書侍御史十年除安西路總管安西故京兆省臺所治號稱會府前政壅滯者三千牘世延旣至不三月剖决殆盡陝民饑省臺議請于朝賑之世延曰揀荒如揀火願先發廩以賑朝廷設不允世延當傾家財若身以償省臺從之所活者衆至大元年除紹興路總管改四川肅政廉訪使蒙古軍士科差繁重而軍士就戍往來多害人且軍官或抑良爲奴世延皆除其弊而正其罪又修都江堰民尤便之四年陞中奉大夫



陝西行臺侍御史先是八百媳婦爲邊患右丞劉深往討之兵敗而還坐罪棄市及是右丞阿忽台當繼行世延言蠻夷事在鞫縻而重煩天討致軍旅亡失誅戮省臣藉使盡得其地何補於國今窮兵黷武實傷聖治朝廷第當選重臣知治體者付以邊寄兵宜止勿用事聞樞密院臣以爲用兵國家大事不宜一人之言爲輿輟世延聞之章再上事卒罷皇慶二年拜江浙行省叅知政事尋召還拜侍御史延祐元年省城奏止奉詔漢人叅政用儒者趙世延其人也帝曰世延誠可用然雍古氏非漢人其署宜居右遂拜中書叅知政事居中書二十月遷御史中丞有旨省臣自平章以下率送之官其禮前所無有由是爲權

大同縣志

卷十六

人物

四

臣所忌乃用皇太后旨出世延爲雲南行省右丞陛辭帝特命仍還御史臺爲中丞三年世延劾奏權臣太師右丞相帖木迭兒罪惡十有三詔奪其官職尋陞翰林學士承旨兼御史中丞世延固辭乃解中丞五年進光祿大夫昭文館學士守大都留守乞補外拜四川行省平章政事世延議卽重慶路立屯田物色江津巴縣閑田七百八十三頃摘軍千二百人墾之歲得粟萬一千七百石明年仁宗崩帖木迭兒復居相位銳意報復屬其黨何志道誘世延從弟胥益兒哈呼誣告世延罪逮世延置對至夔路遇赦世延以疾抵荆門留就醫帖木迭兒遣使督追至京師俾其黨煅煉使成獄會有旨事經赦原勿復問帖木迭



兒更以它事口帝繫之邢曹逼令自裁世延不爲動居囚再歲皆益兒哈呼自以所訴涉誣欺亡去中書左丞相拜住屢言世延亡辜得旨出獄就舍以養疾先是帝獵北涼亭顧謂侍臣曰趙世延先帝所尊禮而帖木迭兒妄入其罪數請誅之此殆報私怨耳朕豈能從之侍臣皆扣頭稱萬歲帖木迭兒在上京聞世延出獄索省牘視之怒曰此左丞相罔上所爲也事聞帝語之曰此朕意耳未幾帖木迭兒死事乃釋世延出居於金陵泰定元年召還朝除集賢大學士明年出爲江南行臺御史中丞四年入朝復爲御史中丞又遷中書右丞明年有旨趙世延頃爲權姦所誣中書宜徧移天下昭雪其非辜仍加翰林學士承

大同縣志

卷十六

人物

四三

旨光祿大夫經筵開兼知經筵事揀選勸講者皆一時名流又加同知樞密院事泰定帝崩燕鐵木兒與宗王大臣議武宗二子周王懷王於法當立周王遠在朔漠而懷王久民間備嘗艱險民必歸之天位不可久虛不如先迎懷王以從民望八月卽定策迎之于江陵懷王卽位是爲文宗當是時世延贊畫之功爲多文宗卽位世延仍以御史中丞兼翰林學士承旨以疾乞歸田里詔不允天曆二年正月復除江南行臺御史中丞行次濟州三月改集賢大學士六月又加奎章閣大學士八月拜中書平章政事冬世延至京固辭不允詔以世延年高多疾許乘小車入內至順元年詔世延與虞集等纂修皇朝經世大典世



延慶奏臣衰老乞解中書政務專意纂修帝曰老臣如卿者無幾求退之言後勿復陳四月仍加翰林學士承旨封魯國公秋以疾移文中書致其事明日即行養疾於金陵之茅山詔徵還朝不能行二年改封涼國公元統二年詔賜世延錢凡四萬緡至元改元仍除奎章閣大學士翰林學士承旨中書平章政事魯國公明年五月至成都十一月卒享年七十有七至正二年贈世延執法佐運翊亮功臣太保金紫光祿大夫上柱國追封魯國公諡文忠世延歷事凡九朝厥歷省臺五十餘年負經濟之資而將之以忠義守之以清介飾之以文學凡軍國利病生民休戚知無不言而於儒者名教尤拳拳焉為文章波瀾浩瀚

大同縣志

卷十六

人物

四三

一根於理嘗較定律令彙次風憲宏綱行于世五子達者三人野峻台黃州路總管次月魯江浙行省理問官伯忽夔州路總管天歷初囊加台據蜀叛死于難特贈推忠秉義効節功臣資善大夫中書右丞上護軍追封蜀郡公諡忠愍

元史

孫祥大同人正統十年進士授兵科給事中擢右副都御史守備紫荆關也先逼關都指揮韓青戰死祥堅守四日也先由間道入夾攻之關破祥督兵巷戰兵潰被殺言官誤劾祥棄城遁寇退有司修關得其屍戰地焚而瘞之不以聞祥弟祺詣關言寃詔卹其家成化改元錄其子紳為大理寺右評事

明史

李植字汝培父承式自大同徙居江都官福建布政使植舉萬曆



五年進士選庶吉士授御史十年冬張居正卒馮保猶用事其黨錦衣指揮同知徐爵居禁中爲鬪章奏擬詔旨如故居正黨率倚爵以自結於保爵勢益張而帝雅銜居正保未有以發御史江東之首暴爵奸并言兵部尚書梁夢龍與爵交驩以得吏部宜斥帝下爵獄論死夢龍罷去植遂發保十二大罪帝震怒罪保植東之由是受知於帝明年植巡按畿輔請寬居正所定百官乘驛之禁從之帝用禮部尚書徐學謨言將卜壽宮於大峪山植扈行閱視謂其地未善欲偕東之疏爭不果明年植還朝時御史羊可立亦以追論居正受帝知三人更相結亦頗引吳中行趙用賢沈思孝爲重執政方忌中行用賢且心害植三

人寵會爭御史丁此呂事及論學謨卜壽宮之非與申時行等相拄卒被斥去初兵部員外郎稽應科山西提學副使陸檄河南叅政戴光啟爲鄉會試考官私居正子嗣修懋修敬修居正敗此呂發其事又言禮部侍郎何維文代嗣修懋修撰殿試策而侍郎高啟愚主南京試至以舜亦以命禹爲題顯爲勸進大學士申時行余有丁許國皆嗣修等座主也言考官止據文藝安知姓名不宜以此爲罪請勅吏部覈官評以定去留尚書楊巍議黜維文改調應科檄留啟愚光啟而言此呂不顧經旨陷啟愚大逆此呂坐謫植東之及同官楊四知給事中王士性等不平交章劾巍語侵時行東之疏言時行以二子皆登科不樂



此呂言科場事魏雖此居正實媚時行時行魏並求去帝欲慰  
留時行名還此呂以兩解之有丁國言不謫此呂無以安時行  
魏心國反覆詆言者生事指中行用賢爲黨中行用賢疏辨求  
去語皆侵國用賢語尤峻國避位不出於是左都御史趙錦副  
都御史石星尚書王遴潘季馴楊兆侍郎沈鯉陸光祖舒化何  
起鳴褚鐵大理卿溫純及都給事中齊世臣御史劉懷恕等極  
論時行國魏不宜去主事張正鵠南京郎中汪應蛟御史李廷  
彥蔡時鼎黃師顏等又力攻請留三臣者之失中行亦疏言律  
禁上言大臣德政邇者襲請留居正遺風輔臣辭位羣起奏留  
贊德稱功聯章累牘此諂諛之極甚可恥也祖宗二百餘年以

大同縣志

卷十六

人物

四

來無諫官論事爲吏部劾罷者則又壅蔽之漸不可長也帝竟  
留三臣責言者如錦等指其後啟愚卒爲南京給事中劉一相  
劾去時行亦不能救也帝追讐居正甚以大臣陰相庇獨植東  
之可立能發其奸欲驟貴之風示廷臣一相又劾錦衣都督劉  
守有匿居正家資帝乃諭內閣黜守有超擢居正所抑邱樞余  
懋學趙世卿及植東之凡五人時行等力爲守有解言樞等不  
宜驟遷帝重違大臣意議雖寢心猶欲用植等頃之植劾刑部  
尚書潘季馴朋黨奸逆誣上欺君季馴坐削籍帝遂手詔吏部  
擢植太僕少卿東之光祿少卿可立尚寶少卿並添註廷臣益  
忌植等十三年四月旱御史蔡系周言古者朝有權臣獄有寃



囚則早植數爲人言至尊呼我爲兒每觀沒入寶玩則喜我其無忌憚如此陛下欲雪枉而刑部尚書之枉先不得雪今日之早實由於植又曰植迫欲得中行柄國以善其後中行迫欲得植秉銓而騁其私倘其計得行勢必盡毒善類今日早災猶其小者其他語絕狂誕所稱尚書謂季馴也疏上未報御史鞏懋賢孫愈賢繼之東之發憤上疏曰思孝中行用賢及張岳鄒元標數臣忠義天植之死不移臣實安爲之黨樂從之遊今指植與交歡爲黨則植猶未若臣之密願先罷臣官不允可立亦抗言奸黨懷馮張私惠造不根之辭以傾建言諸臣勢不盡去臣等不止乞罷職章下內閣時行等請詰可立奸黨主名帝仍欲

兩爲之解寢閣臣奏而勅都察院自今諫官言事當顧國家大體毋以私滅公犯者必罪植東之求去不許給事御史齊世臣吳定等交章劾可立不當代植辨報曰朕方憂旱諸臣何紛爭乃已七月御史龔仲慶又劾植中行思孝爲邪臣帝惡其排擠出之外世臣及御史顧鈐等連章論救不聽是時竟用學謨言作壽宮於大峪山八月役旣興矣大學士王錫爵植館師東之可立又嘗特薦之於朝錫爵故以面折張居正爲時所重三人念時行去錫爵必爲首輔而壽宮地有石時行以學謨故主之可用是罪也乃合疏上言地果吉則不宜有石有石則宜奏請改圖乃學謨以私意主其議時行以親故贊其成今鑿石以安



壽宮者與曩所立表其地不一朦朧易徙若變棋然非大臣謀國之忠也將行奏辨言車駕初闕時植東之見臣直廬力言形龍山不如大峪今已二年忽劾此議其借事傾臣明甚帝責三人不宜以葬師術責輔臣奪俸半歲三人以明習葬法薦侍郎張岳太常何源兩人方疏辭錫爵忽奏言恥爲植三人所引義不可留因具奏不平者八事大畧言張馮之獄上志先定言者適投其會而輒自附於用賢等攖麟拆檻之黨且謂舍建言別無人品建言之中舍採摭張馮舊事別無同志以中人之資乘一言之會超越朝右日尋戈矛大臣如國魏化輩曩嘗舉爲正人一言相左日謀劓皆不平之大者御史韓國楨給事中陳

大同縣志

卷十六

人物

四七

與郊王敬民等因迭攻植等帝下敬民疏貶植戶部員外郎東之兵部員外郎可立大理評事張岳以諸臣紛爭具疏評其賢否頗爲植東之可立地請令各宣力一方以全終始於時行國錫爵魏化光祖世臣定愈賢皆褒中寓刺而力詆季馴戀賢系周仲慶惟中行用賢思孝無所譏貶帝責岳頌美大臣且支蔓不足定國是岳坐免帝猶以植言壽宮有石數十丈如屏風其下皆石恐寶座將置於石上聞月復躬往視之終謂大峪吉遂調三人於外御史柯樾因自言習葬法力稱大峪之美獲督南畿學政而植同年生給事中盧達亦承風請正三人罪士論晒之植東之可立自以言事見知未及三歲而貶植得綬德知州



旋引疾歸居十年起沅州知州屢官右僉都御史巡撫遼東時  
二十六年也植墾土積粟得田四萬畝歲獲糧萬石戶部推其  
法九邊以倭寇退請因師旋選主客銳卒驅除宿寇恢復舊遼  
陽詔下總督諸臣詳議不果行奏稅監高淮貪暴請召還不報  
後淮激變委阻撓罪於植植疏辨乞休帝慰留之明年錦義失  
事巡按御史王業宏劾植及諸將失律植以却敵聞且詆業宏  
業宏再疏劾植欺蔽詔解官聽勘勘已命家姑聽用竟不召卒  
贈兵部右侍郎 明史

麻貴大同右衛人父祿嘉靖中爲大同叅將從鎮帥劉漢襲板升  
大獲俺答圍右衛祿與副將尚表固守乘間擊斬其部長寇乃

大同縣志

卷十六

人物

四六

引退辛愛犯京東祿以宣府副總兵入衛與子遊擊錦並有却  
敵功貴由舍人從軍積功至都指揮僉事充宣府遊擊將軍隆  
慶申遷大同新平堡叅將寇大入掠山陰懷仁應州將吏並獲  
罪獨貴與兄副將錦拒戰有功受賞萬厯初再遷大同副總兵  
十年冬以都督僉事充寧夏總兵官無何徙鎮大同時諸部納  
款久擗力克襲封順義王奉中國益虔貴頻以安邊勞蒙賜資  
十九年爲閱視少卿會乾亨所劾謫戍邊明年寧夏哮拜反廷  
議貴健將知兵且多音家丁乃起戍中爲副將總兵討賊屢攻  
城不克其五月哮拜以套寇五百騎圍平虜堡貴選精卒三百  
問道馳却之俄以總督魏學會命撫著力免銀定宰僧於橫城



啖以重利皆不應貴乃還攻城寧夏總兵董一奎攻其南固原  
總兵李煦攻其西故總兵劉承嗣攻其北牛秉忠攻其東貴以  
游兵主策應時拜自北門出戰將往勾套部貴逐之入城別遣  
將馬孔英麻承詔等擊套寇援兵俘斬百二十人拜初與套部  
深相結諸部長稱之爲王日坐著力兔帳中主籌畫至是不敢  
復出俄朝命蕭如薰代董一奎盡將諸道援兵以貴爲副而李  
如松軍亦至攻益急賊奉黃金繡蟒于卜失兔等請急徇靈州  
先據下馬關沮饒道卜失兔與莊禿賴果合兵犯定邊而宰僧  
從化馬池西沙湃入貴迎擊挫宰僧於石溝會董一元搗土昧  
巢諸部長俱解去賊復乞援於著力兔擁衆大入如松率勁騎

迎戰張亮堡自卯迄巳敵銳甚會貴及李如樟等兵至夾擊之  
寇乃却逐北至賀蘭山獲首級百二十餘持示賊賊益恟懼無  
何城破賊盡平貴以功增秩予廕尋擢總兵官鎮守延綏二十  
二年七月卜失兔糾諸部深入定邊營張春并貴乘虛搗其帳  
於套中斬首二百五十有奇還自寧塞復邀其零騎會寇留內  
地久轉掠至下馬關寧夏總兵蕭如薰不能禦總督葉夢熊急  
檄貴赴援督副將蕭如蘭等連戰驪馬臺薛家窪斬首二百三  
十有奇獲畜產萬五千帝爲告廟宣捷進署都督同知予世廕  
明年卜失兔復入塞掠八日而還順義王擗力克約之納款不  
從復擬大入貴勒兵萬五千人遊擊閻逢時等出紅山爲中軍



叅將師以律等出高家堡神木孤山爲左軍叅將孫朝梁等出定邊安邊平山爲右軍而自以大軍當一面銜枚疾趨踰塞六十里寇莫知所防大潰俘斬四百有奇獲馬駝牛羊千五百再進秩予廕尋以病歸二十五年日本封事敗起貴備倭總兵官赴朝鮮已加提督盡統南北諸軍貴馳至王京倭已入慶州據閑山島圍南原守將楊元道全州守將陳愚衷亦遁倭乘勢逼王京貴別遣副將解生守稷山朝鮮亦令都體察使李元翼出忠清道遮賊鋒生頗有斬獲功叅將彭有德亦破賊青山倭將行長退屯井邑清正還慶州經畧邢玠經理楊鎬先後至分兵三協左李如梅右李芳春解生中高策貴與鎬督左右協兵專

大同縣志

卷十六

人物

五

攻清正策駐宜寧東援兩協西扼行長諸軍至慶州倭悉退屯蔚山如梅誘敗之清正退保島山築三砦自固遊擊矛國器率死士拔其砦斬馘六百五十諸軍遂進圍其城城新築以石堅甚將士仰攻多死圍十日倭襲敗生兵明年正月二日行長來援九將兵俱潰賊張旗幟江上鎬大懼倉皇撤師以捷奏旣而敗狀聞帝罷鎬責貴以功贖與劉綎陳璘董一元分四路貴居東當清正數戰有功會平秀吉死官軍益力攻十一月清正先遁貴遂入島山西浦諸路共俘斬二千二百有奇明年三月旋師進右都督予世廕三十八年命貴鎮遼東泰寧炒花素築鴛九子各將兵他部宰賽煖免又助之邊將畏戰但以增歲賞爲



事寇益無所忌明年臨邊要賞將士出不意擊之拔營遁徙額力索居焉其地忽天明地震炒花驚懼再徙渡老河去邊幾四百里其第三子色特哂之南移可可毋林伺隙入犯貴伏兵敗之追北至白雲山斬馘三百四十有奇色特憤謀復讐糾宰賽以兒鄧皆不應乃東糾卜言顧伯要兒西糾哈刺漢乃蠻合犯清河皆潰以兒鄧等懼代炒花求款邊境乃寧明年插漢虎墩兔以三萬騎入掠穆家堡禦之敗去其夏貴引病乞罷詔乘傳歸貴果毅驍捷善用兵東西並著功伐先後承特賜者七錫世廕者六及歿予祭葬稱一時良將焉兄錦少從父行陣有戰功累官千總協守大同右衛千戶魏昂者坐罪亡入沙漠引寇至

大同縣志

卷十六

人物

五

城下挾取妻子錦伏甲禽之俺答圍城數突圍城卒完尋以殺人并父奪官下吏當事以塞上方用兵而錦父子兄弟並敢戰曲法貸之屢遷宣府遊擊將軍以勤王功進秩一等遷大同叅將隆慶初進本鎮副總兵從趙岢出塞敗寇兵與弟貴並有保境功俺答納款錦招塞外叛人歸者甚衆萬曆五年擢山西總兵官尋改鎮宣府卒錦子承勛遼東副總兵都督僉事南京後府僉書從子承恩都督同知宣府延綏大同總兵官更歷諸鎮以勇力聞後起援遼東屢退避下獄當死詔內馬八百匹免罪其家遂破承詔寧夏叅將從平呼拜有功後爲蒼頭所弑承訓薊鎮副總兵承宣洮岷副總兵承宗遼東副總兵天啟初戰死



沙嶺麻氏多將才人以方鐵嶺李氏曰東李西麻

明史

李懷信大同人由世廕歷都指揮僉事掌山西都司廉勤數被推薦萬厯中遷延綏中路叅將進定邊副總兵卜失兔火落赤鐵雷擺言太等歲擾邊定邊居延綏西被患尤棘懷信勇敢有謀寇入輒敗其先後鎮帥杜松王威張承廕官秉忠又皆一時選故邊患雖遽而士氣不衰四十三年擢甘肅總兵官延人爲立生祠松山寇入掠蘆溝墩諸處懷信邀擊大敗之斬首三百有奇獲駝馬甲帳無算已復分三道犯鎮番諸堡懷信亦分遏之寇引還將士尾其後獲首功百九十有奇自後寇入多失利去威名著河西先是陝西止設四鎮自西寧多警增設臨洮總兵

大同縣志

卷十六

人物

五三

官遂爲五鎮然惟甘延最當敵衝故擇帥常慎而甘肅北有松山南臨青海諸部落環居其外尤難禦懷信在鎮邊人恃以無恐四十七年遼東急詔充援勦總兵官馳赴遼東時熊廷弼爲畧令懷信偕柴國柱賀世賢以四萬人守瀋陽煖免炒花謀入犯廷弼急移懷信戍首山寇不敢入俄泛懿有警檄懷信禦却之遼事益急諸老將多引避廷弼復負氣凌諸將懷信不能堪亦堅卧引疾去天啟二年起鎮大同明年罷已追錄邊功進左都督久之卒於家

明史

曹文詔大同人勇毅有智畧從軍遼左厯事熊廷弼孫承宗積功至遊擊崇正二年冬從袁崇煥入衛京師明年二月總理馬世



龍昇所賜尚方劍令率叅將王承允張叔嘉都司左良玉等伏  
玉田枯樹洪橋鏖戰有功遷叅將自大塹山轉戰逼遵化又從  
世龍等克大安城及鮎魚諸關以興復四城功加都督僉事七  
月陝西賊熾擢延綏東路副總兵賊渠王嘉允久據河曲四年  
四月文詔克其城嘉允脫走轉掠至陽城南山文詔追及之其  
下斬以降以功擢臨洮總兵官黠燈子自陝入山西文詔追之  
及於稷山諭降七百人黠燈子遁尋被獲伏誅李老柴獨行狼  
陷中部巡撫練國事延綏總兵王承恩圍之五月慶陽賊郝臨  
菴劉道江援之會文詔西旋與榆林叅政張福臻合勦馘老柴  
及其黨一條龍餘黨奔磨雲谷副將張宏業遊擊李明輔戰死

大同縣志

卷十六

人物

五三

文詔乃與遊擊左堯堯羅宗允李國奇分勦綏德宜君清澗米  
脂賊戰懷寧川黑泉嶺封家溝綿湖峪皆大捷掃地王授首紅  
軍友李都司杜三楊老柴者神一魁餘黨也屯鎮原將犯平涼  
國事檄甘肅總兵楊嘉謨副將王性善扼之賊走慶陽文詔從  
鄜州問道與嘉謨性善合五年三月大戰西濠斬千級生禽杜  
三楊老柴餘黨糾他賊掠武安監陷華亭攻莊浪文詔嘉謨至  
賊屯張麻村官軍掩擊賊走高山遊擊曹變蛟馮舉劉成功平  
安等謀而上賊潰走變蛟者文詔從子也會性善及甘肅副將  
李鴻嗣叅將莫與京等至共擊斬五百二十餘級追敗之咸寧  
關又敗之關上嶺追至隴安嘉謨變蛟夾擊復敗之賊餘衆數



千欲走漢南爲遊擊趙光遠所遏乃由長寧驛走張家川其逸  
出清水者副將蔣一陽遇之敗都司李宮川被執文詔乃縱反  
間給其黨殺紅軍友遂蹙敗之水落城追至靜寧州賊奔據唐  
毛山變蛟先登殄其衆可天飛郝臨菴劉道江爲王承恩所敗  
退保鐵角城獨行狼李都司走與合可天飛劉道江遂圍合水  
文詔往救賊匿精銳以千騎逆戰誘抵南原伏大起城上人言  
曹將軍已歿文詔持矛左右突匹馬縈萬衆中諸軍望見夾擊  
賊大敗僵死蔽野餘走銅川橋文詔率變蛟與嘉謨及叅將方  
茂功等追擊之大戰陷陣賊復大敗尋與寧夏總兵賀虎臣固  
原總兵楊麒破賊甘泉之虎兇四懸復追賊安口河崇信審白

大同縣志

卷十六

人物

五十四

茅岫皆大獲總督洪承疇斬可天飛李都司於平涼降其將白  
廣恩餘賊分竄文詔追擊之隴州平鳳間十月三戰三敗之遂  
蹙賊耀州雒子山其黨殺獨行狼郝臨菴以降承疇戮四百人  
餘散遣關中巨寇畧平巡撫御史范復粹彙奏首功凡三萬六  
千六百有奇文詔功第一嘉謨次之承恩麒又次之文詔在陝  
西大小數十戰功最多承疇不爲敘巡按御史吳牲推獎甚至  
復粹疏復上兵部抑其功卒不敘當是時賊見陝兵盛多流入  
山西其魁紫金梁泥世王姬關鎖八大王曹操闖塌天與加哈  
利七大部多者萬人少亦半之蹂躪汾州太原平陽御史張宸  
極言賊自秦中來秦將曹文詔威名宿著士民爲之謠曰軍中



有一曹西賊聞之心膽搖且嘗立功晉中而秦賊滅且盡宜敕令入晉協勦於是命陝西山西諸將並受文詔節制六年正月抵霍州敗賊汾河孟縣追及於壽陽巡撫許鼎臣遣謀士張宰先大軍嘗賊賊驚潰六月文詔追擊之斬混世王於碧霞村餘黨爲猛如虎逐走遇文詔兵方山復敗五臺孟定襄壽陽賊盡平鼎臣命文詔軍平定備太原東張應昌軍汾州備太原西文詔連敗賊太谷范村榆社太原賊幾盡帝以文詔功多敕所過地多積糗糧以犒並敕文詔速平賊山西監視中官劉中允言文詔勦賊徐溝孟定襄所司不給米反以礮石傷士卒帝卽下御史按問三月賊從河內上太行文詔大敗之澤州賊走潞安

文詔至陽城遇賊不擊自沁水潛師還擊之芹地劉村寨斬首千餘四月賊屯潤城其他部陷平順殺知縣徐明揚文詔至賊走乃夜半襲潤城斬賊千五百紫金梁老回回白榆社走武鄉過天星走高澤山文詔皆擊敗他賊圍涉縣聞文詔破賊黎城解去五月帝遣中官孫茂霖爲文詔內中軍賊犯沁水文詔大敗之禽其魁大虎又敗之遼城毛嶺山西賊旣屢敗乃避文詔鋒多流入河北帝乃命文詔移師往討而賊已敗鄧圪兵於林縣文詔率五營軍夜襲破之七月大敗懷慶賊柴陵村馘其魁滾地龍又追斬老回回於濟源文詔在洪洞時與里居御史劉令譽忤及是令譽按河南而四川石砭土官馬鳳儀軍敗沒於



侯家庄賴文詔馳退賊甫解甲與令譽相見語復相失文詔拂衣起面叱之令譽怒遂以鳳儀之敗爲文詔罪部議文詔怙勝而驕乃調之大同七年七月

大清兵西征插漢還師入大同境攻拔得勝堡叅將李全白經遂攻圍懷仁縣及井坪堡應州文詔偕總督張宗衡先駐懷仁固守八月圍解卽移駐鎮城挑戰敗還已而靈邱及他屯堡多失陷

大清兵亦旋十一月論罪文詔宗衡及巡撫胡沾恩並充軍邊衛令甫下山西巡撫吳姓薦文詔知兵善戰請用之晉中乃命爲援勦總兵官立功自贖當是時河南禍尤劇帝已允兵部議敕

大同縣志

卷十六

人物

五

文詔馳勦河南賊姓復抗疏力爭請令先平晉賊後入豫帝不許而文詔以姓有恩竟取道太原爲姓所留會賊高加計已殲而鳳陽告陷遂整兵南行八年三月會總督洪承疇於信陽承疇大喜卽令擊賊隨州文詔追斬賊三百八十有奇四月承疇次汝州以賊盡入關中議還顧根本分命諸將扼要害檄文詔入關文詔乃馳至靈寶謁承疇承疇以賊在商雒聞官兵至必先走漢中而大軍由潼關入反在其後乃令文詔由閩鄉取山路至維南商州直搗賊巢復從山陽鎮安洵陽馳入漢中退其奔軼曰此行也道路回遠將軍甚勞苦吾集關中兵以待將軍肘其背而遣之文詔躍馬去五月五日抵商州賊去城三十里



營火滿山文詔夜半率從子叅將變蛟守備鼎蛟都司白廣恩等敗賊深林中追至金嶺川賊據險以千騎逆戰變蛟大呼陷陣諸軍並進賊敗走變蛟勇冠三軍賊中聞大小曹將軍名皆怖惜已而闖王八大王諸賊犯鳳翔趨汧陽隴州文詔自漢中馳赴賊盡向靜寧泰安清水秦州間衆且二十萬承疇以文詔所部合張全昌張外嘉軍止六千衆寡不敵告急於朝未得命六月官軍遇賊亂馬川前鋒中軍劉安烈被執俄副將艾萬年柳國鎮復戰死文詔聞之瞑目大罵亟詣承疇請行承疇喜曰非將軍不能滅此賊顧吾兵已分無可策應者將軍行吾將由涇陽趨淳化爲後勁文詔乃以三千人自寧州進遇賊真寧之

大同縣志

卷十六

人物

七

湫頭鎮變蛟先登斬首五百追三十里文詔率步兵繼之賊伏數萬騎合圍矢蝟集賊不知爲文詔也有小卒縛急大呼曰將軍救我賊中叛卒識之其賊曰此曹總兵也賊喜圍益急文詔左右跳蕩手擊殺數十人轉鬪數里力不支拔刀自刎死遊擊平安以下死者二十餘人承疇聞拊膺大哭帝亦慟悼贈太子太保左都督賜祭葬世廕指揮僉事有司建祠春秋致祭文詔忠勇冠時稱明季良將第一其死也賊中爲相慶弟文耀從兄征討數有功河曲之戰斬獲多後擊賊忻州戰死城下詔予贈

卹從子變蛟自有傳

明史

曹變蛟文詔從子也幼從文詔積軍功至遊擊崇正四年從復河



由明年連破賊紅軍友等於張麻村隴安水落城唐毛山又破  
劉道江等於銅川橋身冠諸軍以御史吳甦薦進叅將文詔移  
山西變蛟從戰輒勝及文詔敗鎮大同山西巡撫許鼎臣言晉  
賊紫金梁雖死老回回過天星大天王蝎子塊闖塌天諸渠未  
滅變蛟驍勇絕人麾下健兒千百才乃文詔亞乞留之晉中從  
之七年羣賊入湖廣命變蛟南征文詔困於大同又命北援七  
月遇

大清兵廣武有戰功其冬文詔失事論戍變蛟亦以疾歸明年文  
詔起討陝西賊變蛟以故官從大捷金嶺川鏖真寧之湫頭鎮  
皆爲軍鋒文詔旣戰歿變蛟收潰卒復成一軍總督洪承疇薦

大同縣志

卷十六 人物

五

爲副總兵置麾下與高傑破賊關山鎮逐北三十餘里又與副  
將尤翟文遊擊孫守法追闖王高迎祥與戰鳳翔官亭斬首七  
百餘級又與總兵左光先敗迎祥乾州迎祥中箭走斬首三百  
五十餘級已而迎祥自華陰南原絕大嶺夜出朱陽關光先戰  
不利賴變蛟陷陣乃獲全九年破闖將澄城偕光先等追至靖  
虜衛轉戰安定會寧抵靜寧固寧賊屢挫其秋追混天星等敗  
之蒲城賊西走平涼鞏昌復擊破之十年二月巡撫孫傳庭部  
卒許忠叛勾賊混十萬謀犯西安變蛟方西追過天星聞亂急  
還賊遂遁傳庭已誅迎祥其黨闖將混天星過天星踞洮岷階  
文深谷間承疇遣變蛟光先及祖大弼孫顯祖合擊四月望入



山遇賊郭家壩大雨諸將力戰賊死傷無算食盡引還九月階州陷與光先並停俸俄擢都督僉事爲臨洮總兵官當是時承疇傳庭共矢滅賊傳庭戰於東承疇戰於西東賊幾盡賊在西者復由階城出西和禮縣光先顯祖皆無功獨變蛟降小紅狼餘賊竄走徽州兩當成鳳間不敢大逞十月賊瞞蜀中虛陷寧羗州分三道連陷三十餘州縣承疇率變蛟等由沔縣歷寧羗過七盤朝天二關山高道狹士馬饑疲歲暮抵廣元賊已走還秦變蛟等回軍邀擊斬首五百餘級時兵部尚書楊嗣昌初四正六隅之說限三月平賊十一年四月以滅賊踰期普議降罰變蛟光先並鐫五官戴罪辦賊賊之再入秦也其渠魁號六隊

大同縣志

卷十六

人物

五

者與大天王混天王爭管王四部連營東犯混天星過天星二部仍伏階文獨闖將李自成以三月自洮州出番地承疇令變蛟偕賀人龍追之連戰斬首六千七百有奇番地乏食賊多死亡變蛟轉戰千里身不解甲者二十七晝夜餘賊潰入塞大弼駐洮州扼戰不力乃走入岷州及西和禮縣山中變蛟還勸賊伏匿不敢出惟六隊勢猶張六月光先自固原進兵賊已奔隴州清水光先追至秦州六隊及爭管王復走成縣階州爲變蛟所扼其別部號三隊及仁義王混天王降於光先而自成六隊及其黨祁總管避秦兵復謀犯蜀副將馬科賀人龍拒之將還走階文及西鄉憚變蛟乃走漢中又爲光先所扼六隊祁總管



皆降惟自成東遁承疇令變蛟窮追而設三覆於潼關之南原  
變蛟追及大呼斫賊伏盡起賊屍相枕藉村民用大棒擊逃者  
自成妻女俱失從七騎遁去餘皆降是時曹兵最強各鎮依之  
以爲固錄關中平賊功進變蛟左都督十一月京師戒嚴召承  
疇入衛變蛟及光先從之明年二月抵近畿帝遣使迎勞將士  
各有賜未幾戰渾河無功再戰太平砦北小有斬獲及解嚴留  
屯遵化麾下皆秦卒思歸多逃亡者追斬之乃定時張獻忠羅  
汝才既降復叛陝西再用兵總督鄭崇儉乞令變蛟兵西還帝  
不許尋用爲東協總兵官十三年五月錦州告急從總督承疇  
出關駐寧遠七月與援勦總兵左光先山海總兵馬科寧遠總  
兵吳三桂遼東總兵劉肇基遇

大同縣志

卷十六

人物

卒

大清兵於黃土臺及松山杏山互有殺傷

大清兵退屯義州承疇議遣變蛟光先科之兵入關養銳留三桂  
肇基於松杏間佯示進兵狀又請解肇基任代以王廷臣遣光  
先西歸代以白廣恩部議咸從之而請調旁近邊軍合關內外  
見卒十五萬人備戰守用承疇言師行糧從必芻糧足支一歲  
然後可議益兵帝然之敕所司速措給徵宣府總兵楊國柱大  
同總兵王樸密雲總兵唐通各揀精兵赴援以十四年三月偕  
變蛟科廣恩先後出關合三桂廷臣凡八大將兵十三萬馬四  
萬並駐寧遠承疇主持軍而朝議以兵多餉艱職方郎張若麒



趣戰承疇念祖大壽被圍久乃議急救錦州七月二十八日諸軍次松山營西北岡數戰圍不解八月國柱戰歿以山西總兵李輔明代之承疇命變蛟營松山之北乳峯山之西兩山間列七營環以長壕俄聞我

太宗文皇帝親臨督陣諸將大懼及出戰連敗餉道又絕樸先夜遁

通科三桂廣恩輔明相繼走至杏山迤南沿海東至塔山爲

大清兵邀擊渤海死者無算變蛟廷臣聞敗馳至松山與承疇固守三桂樸奔據杏山越數日欲走還寧遠至高橋遇伏大敗僅以身免先後喪士卒凡五萬三千七百餘人自是錦州圍益急而松山亦被圍應援俱絕矣九月承疇變蛟等盡出城中馬步

大同縣志

卷十六

人物

三

兵欲突圍出敗還守半年至明年二月副將夏成德爲內應松山遂破承疇變蛟廷臣及巡撫卬明仰故總兵祖大樂兵備道張斗姚恭王之楨副將江翥饒勳朱文德叅將以下百餘人皆被執見殺獨承疇與大樂獲免文德義州衛人後家錦州崇正時積功至松山副將忤監視中官高起潛爲所中斥罷十一年起故官及城被圍領前鋒拒守甚力城破竟死三月大壽遂以錦州降杏山塔山連失京師大震詔賜諸臣祭葬有司建祠變蛟妻高氏以贈廕請乃贈榮祿大夫太子少保世廕錦衣指揮

僉事

明史

何廷魁字汝謙山西威遠衛人

按明初威遠衛屬大同府何氏已入籍大同縣當時考試尚用衛籍



萬曆二十九年進士授涇縣知縣調寧晉遷刑部主事歷歸德衛輝河南知府西寧副使坐考功法復爲黎平知府會遼事棘遷副使分巡遼陽袁應泰納降廷魁爭不聽及瀋陽破同事者遣孛歸廷魁曰吾不敢爲民望

大清兵渡濠廷魁請乘半濟急擊之俄薄城圍未合又請盡銳出禦應泰並不從遼陽破廷魁懷印率其妾高氏金氏投井死婢僕從死者六人都司徐國全聞之亦自經公署事聞贈光祿卿再贈大理卿賜祭葬諡忠愍世廕錦衣百戶國全贈卹如制明史省府二志人物中皆載元臣忽蘭按元史速哥第四子名忽蘭並未載爲大同人今以元史爲定故刪之

大同縣志

卷十六

人物

三

漢魏六朝諸書宋遼元明各史卽注於各傳之下蓋論世所以知人也其傳中大同人雲中人雖邑乘無庸此然史家舊文未便刪節以後各冊皆令所編錄故不復注其各朝代卽分見於小傳中若

本朝人物則舉順治康熙各年號而其義自見

勲節

綜考二十一史以下至明史凡邑中人物之見於史傳者並錄之而歷溯前代以迄

本朝蓋臣勲舊足以爭光史冊垂世不朽者又二十四人彙爲一冊若起前賢於今日豈得謂古今人不相及哉



張升字進之仕金由戶工部令史出身為漁陽簿遷絳州錄事天  
興二年十一月河解元帥趙偉自金雞堡渡河入陝州界劫殺  
行省阿不罕奴十刺升謂知識者曰我本小人受國家官祿今  
口國家遭不幸我不能從反賊也言訖赴水死岸上數百人皆  
嗟惜之 通志

張安字定之世襲百戶成化間以神木等處功陞指揮僉事再以  
威寧海子功陞山西行都司指揮僉事又以守備大同左衛地  
方功陞指揮同知加都指揮使宏治間改守朔州又改天成一  
年充大同遊擊將軍凡五載充副總兵協守寧夏以賀蘭山功  
陞都督僉事屢有白金文綺蟒衣之賜正德間寧夏有警掛征

大同縣志 卷十六 人物

六三

西將軍印一年大同有警復掛征西前將軍印俱充總兵官鎮  
其地時年六十疏乞致仕得請卒年七十五安生長代北家傳  
韜畧天資凝重才兼智勇尤能練士卒知幾料敵自偏裨至大  
將四五十年間大小數十餘戰未嘗敗北前後巡撫總制多薦  
之大司馬以為鎮將第一子輓輒俱有父風 通志

陳韜明正德中任招遠縣縣丞流賊劉六等奄至城下韜慨然任  
捍禦事督士民死守越數日外援不至城破被執罵賊死事聞  
贈登州府通判 通志

溫景葵字汝陽明嘉靖戊子舉人令長山陞御史守蘇州並有治  
績東中邊事孔棘兵道初設乃自霸州道移任永平四年創制



運籌詳審精密如數贖傷農立爲權明法因軍餉對支掠害商人立爲入倉法因將士重冒行糧濫費立爲稽塗法因後府催徭殘坑衛職疏准爲徑解惜薪司法修建昌營石門寨半壁山等城爲邊疆保障處置有方財不費而民不擾選士人孤山書院延師豐廩嚴程課如親子弟科甲多出其門特擢都御史巡撫順天三載告病歸

通志

林椿字永年幼有孝行明嘉靖中襲父職右衛指揮僉事積功晉署指揮僉事歷左副總兵協守大同俺答入總兵張達被圍椿時別擊零騎於彌陀山急引兵西救一日三戰亦陷重圍與達皆歿贈都督同知諡忠勇立祠賜祭葬子鳳騰廕指揮僉事世

大同縣志

卷十六

人物

六

襲

通志

栗繼芳明嘉靖中敵入寇禦之繼芳以試百戶從至小營圪塔茨林兒獨與敵遇直前與之搏敵斬數十人敵圍之數重繼芳不少挫戰益力旋歿於陣事聞詔祀勸忠祠中

通志

關山明嘉靖中以都指揮使任宣府中路叅將敵擁六萬騎由毛家溝入葛峪勢甚亟山率所部千人奮勇進兵旣交被圍風霾大作矢擯射如雨山督將士力戰自辰至酉越次日黎明殺傷幾千餘人遂歿於陣兵部上其狀賜贈卹

通志

王福驍勇通兵畧明嘉靖中以指揮管千總事二十八年敵入犯福出哨與遇於曹家庄奮勇徑進斬首五級陷陣中以死事聞



敘恤有加 通志

馬舉字虎山以材勇充紅旗把總奮力陷陣馬蹶被殺巡撫撰文  
遣祭厚恤其家 府志

麻祿明嘉靖中爲大同叅將右衛被兵與副將尚表固守乘間擊  
勝之以宣府副總兵入衛與子遊擊錦並有戰功錦少從父行  
陣有戰績累官千總協守大同以罪奪官當事謂錦父子兄弟  
並敢戰曲法貸之屢遷宣府遊擊將軍以勤王功進秩一等遷  
大同叅將隆慶初進副總兵與弟貴並有保境功萬曆五年擢  
山西總兵官尋改鎮宣府卒弟富弱冠從父臨陣力戰死 府志

李橫明崇正初累官遵化中營叅將性忠勇每戰輒先登爲麾下

大同縣志 卷十六 人物

六五

倡二年督所部勤王擐甲橫刀大呼徑進陷陣死後得其屍猶  
勃勃如生事聞贈都督僉事 府志

張爾塾丰姿魁岸慷慨有氣節精騎射嫻韜畧居家事母以孝聞  
鄉里爭訟率一言決定人服其公明崇正癸未官撫標守備都  
城戒嚴奉令領健卒五百爲前鋒直前搏戰及圍之數重乃下  
馬步鬪箭不虛發身被重創奮擊愈厲會日暮救援不至顧左  
右止存二三人乃仰天大呼曰見危授命吾得死所矣遂力戰

死事聞贈卹 府志

李若葵邑廩生明崇正十七年闖變與兄象葵弟諸生心葵從子  
柱周衣冠拜畢願壁曰一門完節偕婦女五口俱縊死 府志



杜國慶以武舉累官沂州鎮標遊擊饒材勇精騎射慷慨許國嘗有死綏之志順治六年土寇竊發率其黨攻城武縣國慶馳往救之擒渠魁王心茂王希純等已復攻定陶國慶汎地也偕縣令李文學殫力防禦一日遇賊振臂大呼徑入其陣文學督兵繼之賊黨披靡而援兵不至賊復合圍甚堅國慶屢馳擊不得出與文學偕死撫按合疏以聞得

卹典如制

府志

李承鑛順治六年由選貢知房縣居縣西羊角寨招撫流亡賊潛伏山谷一日夜行三百里襲之被執不屈死

府志

常志強弟志旺炳之父也順治五年姜瓖變賊黨王忠爲飲具名

大同縣志

卷十六

人物

三

常酒半以謀告炳叱之忠語漸逼志強勃然推案起嚙指誓死拒聲色俱厲因縛送左雲衛僞叅將所杖三人各百餘恠毒備至志旺瞑目大罵賊怒刃其頰血濺賊面遂遇害志強父子被囚會大兵克復左雲擒忠等斬之乃得免炳後官大水口操守

府志

高鼎明季遭闖寇之亂聚鄉勇保五臺順治丙申來歸授叅將尋陞湖廣興國州副將調浙江湖州協渠匪趙太茹二茹三等俱就擒滅康熙乙卯充總兵官從征吳逆將軍趙良棟檄守風火臺險隘備著勞績賊旣平擢福建興化鎮總兵良棟奏松潘爲西川門戶非高鼎不足彈壓遂改鎮松潘癸亥奉命進勦巴豬



寨羣醜乃規度形勢設疑兵誘戰自引輕騎問道出王黃六定寨直搗其巢賊驚潰縱擊大破之斬數百級餘悉降在鎮十四載威信大行人民悅服年七十四屢疏乞歸又五年而卒

贈都督同知賜祭葬鼎目光如炬趨捷善馳殺尤擅火攻智勇少

公稱一時名將焉第四子麟端勇捷有父風以蔭授藍翎侍衛

歷川北鎮右營遊擊陞參將嘗從征滇蜀累樹戰功孫浚康熙

間官蘇州知府有賢龍聲

府志

全光英由行伍起家順治十六年任江蘇水師協都司海賊鄭成功陷崇明遂犯江寧光英從總兵官梁化鳳率兵擊走之克復

崇明以功超擢副將協鎮其地海疆晏然加授騎都尉世襲

府志

### 大同縣志

卷十六

人物

二十七

魏麟康熙三十五年以材勇從撫遠將軍征噶爾丹殺賊有功授

把總累擢至直隸真定鎮總兵官雍正七年大兵征策旺授為

車陣漢統管領直隸山東山西河南四省車騎兵會勦每戰輒

身先士卒俘斬甚衆明年進至庫列兒地方賊屬至圍之數匝

麟奮勇潰圍出以馳救諸將復陷陣身被數十創與副將軍查

弼納前鋒將軍丁壽等俱力戰而歿次子承燾從亦死事聞

賜祭葬贈都督同知祀昭忠祠蔭一子

府志

馮廷輔由行伍累官廣西潯州協副將康熙壬寅苗人覃普滋擾

南峙地灘五旋等處相繼煽動假廷輔總兵銜率師討之賊據

山阻水自固廷輔乘夜潛兵透山背縛筏而渡既薄巢鎗齊齊



發火光燭天賊衆驚潰以爲神赴江墜崖死者不可勝計生擒渠首覃普及其黨三百餘人提聞

賜資甚厚特授浙江黃巖鎮總兵官擢其子千總得勝爲侍衛

府志

史成康熙丙子以把總隨征噶爾丹戰名磨多有功累遷湖廣永定營遊擊境多灘河白馬牛鼻大星小星犀角烏殼陰溪鬼棒八灘尤險惡舟至輒壞爲捐俸鍛石鑿稜順水性而治之行旅利賴癸未冬奉提督檄進勦紅苗卒僅百人至小天星寨與賊遇力戰破之斬首四百九十餘級復追敗之排陸梁賊氣沮將遁入老枉山成率輕兵趨山後堵絕隘口返擊之斬獲無算賊平以功陞叅將歷辰州協副將尋擢浙江黃巖鎮總兵官先是

大同縣志

卷十六

人物

六

劇賊陳君元等海洋剽竊爲商民患成嚴督官兵指授機宜皆以次擒滅在鎮三載卒於官

特賜祭葬成起卒伍至大將歷官二十餘年屢樹勲績家無餘資子載賢湖廣提督從孫宏蘊廣西提督俱克世其家論者比之前代麻氏云

府志

劉章字煥然年二十餘從行陣以功授千總累陞助馬路叅將領大同鎮標官兵戍甘州尋調赴西寧又調涼州士卒多里人子將出師申令於衆有干紀律者卽親故弗宥軍行肅然雍正丁未由南雄協副將擢授廣東高雷廉鎮總兵官會安南國違例闌入滇南廷議致討制府知其能檄令率兵二千往相機勦撫



章言小國雖不循舊例，況跡未彰，宜先諭以定制，如不悛，改進兵未晚。制府然之，果遣使齎表謝罪，守約如初。明年調江西南贛鎮，南康贛民以私忿聚千人，挺刃相向，勢洶洶。章單騎馳諭，立時解散。後移鎮太原，累疏乞休歸。卒年七十。初，高州火延燒數百家，贛屬南安縣水暴漲，壞民廬舍，並捐廉周卹，令無失所。故兩鎮尸祝之。府志

霍昇字正清，世多隱德，生而有勇畧，能左右射，弱冠釋耒從戎，進勦名磨，多力戰有功，主帥名與語甚奇之，曰：大將材也。康熙四十二年，大同總鎮以湖廣提督征紅苗，奏昇隸帳下，為親兵，鎮尊之，捷生擒賊十三人，積功授千總，累擢至雲南永順鎮總兵。

大同縣志

卷十六

人物

六

官調廣西左江鎮，雍正十年署貴州提督，時九股苗聚眾阻建城，汎絕糧道，官軍屢劬，昇統兵由下乘直抵台，拱晝夜督攻，連破土城七十寨，四十六分兵三路，勦捕賊黨悉定。陞廣西提督，明年逆苗餘孽復蠢動，率師討平之。乾隆三年以疾卒於官，年六十六。孫宗光，道光壬午進士，現任甘肅張掖縣知縣，以軍功加知州。府志

任舉字漢冲，赭面長鬚，才勇過人。雍正二年成武進士，授陝西柏林守備，從征巴里坤有功，遷寧夏都司，用薦陞固原遊擊。乾隆十一年，固原提督失馭，悍卒數千推仝文耀為首，滋擾聞變，杖劍趨出，登鼓樓曉諭，禍福賊沮喪，引去。俄復三面攻城，舉馳赴



東門賊攀垣上立斬其首擲城下復急毀女牆擊之賊驚潰所部僅五十人戰具不充而南門已陷賊眾塞巷舉趨往揮刀斬數十人賊懼奔出城尾追勦捕餘黨悉散以捍禦功擢中管叅將會金川逆命特授西鳳協副將晉署重慶鎮總兵督兵進勦山谿險阻舍馬徒步冒雨拔山而進首襲普嶺扼其吭遂取噶達達刺木岡等十餘處卡崙並破木石城及碉樓二百餘座駐軍色兒力山梁以深入賊避其鋒退守石城不出城堅厚矢石如雨不能克令伐樹人製一木枋以蔽槍石權立木城深溝塹築礮臺因風發礮石城鱗碎按步步圍城法攻之賊勢窮蹙遂持火具薄城城上槍礮齊發傷左足賊悉出圍戰益力欲乘勢

大同縣志

卷十六

人物

七

先登伏賊起濠中斫傷右手刀墜地賊復蠶至奪槍連刺數十人俄中鳥鎗洞胸撲地嘔血大呼報國而絕時年四十六事聞上諭祭立碑恤贈如提督例諡勇烈入祀昭忠祠

賜資塋地蔭其二子官以其弟鳳由守備超擢叅將陞副將鳳歷官亦有賢聲

府志

御賜祭文

皇帝諭祭四川重慶鎮總兵官任舉之靈曰奮勇力于行間臣子効馳驅之節黃恩榮于地下國家重軍旅之功矧臨陣而不有其身斯表忠而聿隆厥報彝章載考莫醜攸頒爾四川重慶鎮總兵官任舉韜畧夙嫻戰功累建曩值固原之弗靖適以叅將



而臨戎躍單騎以揮戈驅除賊黨奠全城于安堵擁衛民居爰以素著之威名俾靖番酋之逆命擢之專閫所向摧堅授以偏師洵能致果方冀凱旋奏捷策勲廊廟之中不期深入被創効命疆場之外念成勞之具在軫悼良深思烈氣以如生優崇式逮爰加贈卹特展芳筵於戲扞疆圍而執干戈未畢九原之志聽鼓鼙而思將帥空招萬里之魂爾靈有知尚其祇受

御賜碑文

朕惟疆場効命臣子盡瘁之忱綸綍頒榮盛代推恩之典苟生懷報稱不避艱危斯歿可褒揚有光泉壤彝章攸載錫賚宜敷爾四川重慶鎮總兵官任舉性秉樸忠材兼驍果衛邊城而靖

大同縣志

卷十六

人物

七

亂壯猷已著于秦疆任專閫以統兵勇畧復宣于蜀徼提戈擐甲不辭薄險之危陷陣摧鋒竟蹈舍生之義履戎行而被難臣節斯全感知遇以捐軀朕心用惻特從優格幸沛隆施贈顯秩以酬庸入昭忠而從祀易名勇烈惟爾攸宜於戲馬鬣新封想英風而如在龍章載錫思壯氣以常存期風示於來茲俾永垂於貞石

儒林

士君子處則言坊行表出則功施爛然所謂通天地人三才謂之儒者非乎邑中自前明成宏隆萬之間人材輩出故史傳勲節而外足以冠冕人倫者又得若而人今蓋不逮於古



矣是在司教養之責者培植之薰育之顧可緩乎哉用集往哲以資考鏡

裴遵為燉煌太守光武既得河西四郡名見郡邑吏以遵為賢從征蜀帝既還命遵率偏師從大司馬吳漢等討公孫述定蜀地有功卒祀於鄉

府志

田炯明洪武中起家太學生洊歷中外勤慎簡約後官吏部左侍

郎銓選精當有山巨源遺風

府志

齊政明永樂丁酉舉人授鴻臚寺序班改鳴贊秩滿遷主簿仍掌鳴贊事擢寺丞歷右少卿晉正卿疏請致仕優詔不許又四年復疏請許歸展墓畢復回寺理事年七十七始予告歸政貌魁

大同縣志

卷十六

人物

七

梧音吐如洪鐘侍殿陛進退皆有常度卒遣官諭祭卹典獨厚

府志

武達明永樂中以鄉舉擢禮科給事才識老成隨事多建白陞浙

江布政司叅議有惠績尋遷廣西叅政致仕卒

府志

李文煥明永樂中由太學生累官五堡知縣廉敏有為初任神木典史植弱除暴以幹濟稱至是為親民官生聚教訓日久愈力民皆親愛之

府志

蔣應奎明嘉靖丙戌進士授工部都水司主事治河呂梁遷營繕司郎中董建兩宮功成超拜太僕寺少卿遷應天府尹以嚴為治勲戚中有橫肆者悉裁以法捐金修學宮墾秣陵荒田千餘



頃擢副都御史巡撫寧遠開原一帶人為戶部侍郎改兵部兼  
僉都御史應奎性恬淡為諸生時常帶衣養父母既貴益堅素  
節卒之日喪幾弗舉後贈兵部尚書

府志

馬彥明嘉靖壬子舉人文章行誼為士林望初守薊州遷鎮江府  
同知防江練舟師盜賊屏跡署丹陽諸廢聿興開馬嘶港為一  
邑永利擢戶部員外尋陞潁州兵備僉事潁多盜難治彥多方  
擒之民賴以安泗水衝嚙有司堤之輒壞彥親督料理乃堅厚  
可久焉以憂歸哀毀得疾行至廣陵卒子呈德萬歷庚子解元  
庚戌進士官中書舍人

府志

覃應元字德芳明嘉靖乙丑進士授歷城知縣縣近郭多汙萊為

大同縣志

卷十六

人物

七三

開田北山下引湖水為渠教以灌溉又開東山險路便車馬往  
來三年奏捷第一遷南京刑部主事歷戶部員外兵部郎中出  
為河南府知府擒妖匪許天信及嵩山礦徒首惡郡內宴然遷  
四川分巡副使移陝西副使備兵延綏鞏神木鎮疆諸城堡墾  
永濟荒田調湖廣長沙兵備遷陝西苑馬少卿致仕卒之日圖  
書數卷蕭然如書生

府志

陸敏捷明萬歷壬午舉人性率真達於政事任荻道知縣興利剔  
弊多善政陞德州知州遷河間同知時靜海縣饑民煽禍敏捷  
擒首惡散餘黨不動聲色而定謝學鹽常例重修天津城築重  
隄護運河迄今猶稱陸隄云

府志



李杜植弟明萬歷丙戌進士幼穎異十三爲縣庠弟子員十九舉於鄉二十成進士授遵化知縣威惠服人會巡撫恡餉姦弁曠譁者數千人環甲四集杜諭以恩信軍羅拜授命詣撫力請餉撫以庫竭爲詞杜用縣儲給之乃寧陞禮部郎卒於官弟橫天性孝友篤學高行天啟間歲貢任平定州學正士多造就府志張爾基應武孫明萬歷壬辰進士三任知縣政清訟理民歌其惠以卓異行取陝西道御史指陳時政直聲震遐邇巡按貴州戢定南蠻轉山東僉事陞榆林副使得軍士心以功加右布政在告數年起寧紹副使府志

馬呈秀多之從子明萬歷甲辰進士初告終養授評事遷寺正恤

大同縣志

卷十六

人物

七十四

刑雲貴全活甚衆出守延安捐俸治河患時有烽警呈秀單騎爲士卒先邊境無虞大猾孫養蒙爲民害寘之法尋備兵商雒陞障南叅政時盜匪起伏不常設謀擒斬民賴以寧至今立祠祀之府志

王從義父景新謹厚多隱德從義性孝友端方廉介登明萬歷丁未進士授評事多所平反歷郎中陞東昌知府以勤農興學爲首務修濬城池士民勒石建祠以祀秩滿以副使備兵壽張會徐鴻儒之變多方弭制殲渠魁而安善良全活數萬人究民頌之遷河南叅政未幾以右布政備兵沂州嚴立保伍一境帖然擢河南左布政持身廉約禁絕饋遺戊辰進副都御史巡撫山



東適歲歉招撫流移數萬人開墾荒田擊除大猾不遺餘力尋以協餉功進戶部右侍郎引疾歸總督楊嗣昌特舉不起母喪哀毀骨立幾至於絕

府志

李炳明天啟壬戌進士授中書選御史巡節慎庫一塵不染條上諸邊務稱旨出巡浙修海堤嚴捍禦爲永賴計差滿繼巡雲南卒於官咸爲悼惜

府志

李國英字培之邑人滿洲籍少倜儻志氣岸然從肅王收四川以才畧擢巡撫闕荆棘招流移蜀疆漸定晉尚書總督川陝以秦事付陝撫再統師入川大興屯田以牛種數萬給墾者軍儲獲充又疏設學政頒憲綱撫軍士復遐疆招來譚姓大族請封

大同縣志

卷十六

人物

七五

侯伯者四人世所稱三譚也與士卒同甘苦廬帳簣牀外無長物俸糈盡供椎牛饗士之用秦蜀胥倚爲樞壁晉太子少保以勞成疾卒於官

府志

郭傳芳字九芝父之麟前九江府監紀同知傳芳順治戊子膺選貢曹侍部秋嶽嘗言雲中有二士徐化溥與傳芳也選註咸寧縣丞諸上官雅知之會修陝西通志命司其事署邵陽長安縣篆所至有聲遷富平知縣滇逆之變哀甲乘大霧徑搗其巢斬渠首二人獲僞劄三十餘紙時轉輸填委多所寬假嘗抗聲曰爲百姓卽所以爲朝廷也舉卓異遷達州知州邑人攀泣信宿不得發抵達州匝月病卒無以爲殮甥僕從者亦繼死後其子



訓導荆石匍匐往始克以喪歸富平李太師因篤誌其墓云府志  
任承恩字畏齋以父蔭侍衛歷官兗州總兵松江提督調福建提  
督臺灣林爽文作亂率兵五千渡海人或危之承恩義形於色  
奮不顧身既出緣事被逮未幾

上念其忠臣子且無後補海定副將先是承恩任淮安叅將時淮  
水爲城患力禦之民賴以安陞漕標副將八省通漕伍丁向有  
餽送陋規承恩獨拒絕尤人所難雖任戎行而通經術工詩文  
爲當時公卿所推重所著有二峩草堂詩集與父勇烈公任舉  
並有詩集行世儒將風流克世其家洵不愧儒林也弟承緒別  
有傳

